

# LAI YAWSUX

## (Joshua)

---

**1** *Sibrawm Tawx Siyiex Ka Yawsux*  
Khaix hoik yum Mose, pa mawh kawncau Simiang Siyiex mai khaix hoik luan ceuan khankix, Simiang Siyiex sikah mai Yawsux pa mawh kawn simex Nun mai pa mawh cao pa teem ka Mose ah nin, <sup>2</sup> “Kawncau Aux hoik yum heue. Mawh kheu nan, yam in yaog ti kaoh mai hu ka plak toi rawm klawng Yawdan, maix khawm pui inkix khawmuik mai laig ka dauh haktiex pa sang tawx Aux ka kawn praix Isarela khankix heue. <sup>3</sup> Can dee pa tak sang dig pex ka tiag caong tix khankix Aux hoik tawx ka pex, awm pa hoik tawm Aux ka Mose heue. <sup>4</sup> Jah khaing dauh tiag mai gawng Lebanon in tom hoek ka rawm klawng ting Upharetix mai haktiex ceu pui Hitix khankix khawmuik mai ka rawm sigritsigra ting pa koe plak klip singaix khankix tak mawh mee haktiex cie pex. <sup>5</sup> Pui tix kaux kawx tak ang pon ti cung ka plak sivoie maix ka dauh bawgyam singaix im ju maix, awm pa hoik ot Aux tau mai Mose. Mawh kheu nan, Aux tak ot tau mai maix. Aux tak ang prah maix mai ang doh tikvud ka maix. <sup>6</sup> Teei riang rao tix mai kieh koe krax kuarhawm ka dauh ceu pa mhawm. Grawh grawng nawh, ka son pui inkix, maix taksang goih ti tawx haktiex son sinngao pa sang pon kix ti cie, ka pa hoik tiextu Aux ka keeing kix mai tawx ka kix heue. <sup>7</sup> Teei riang rao tix mai kieh koe rhawm kied kua ka dauh ceu pa mhawm sonsang pon hawt maix ti yuh awm gumlox pingnyap pa tawm kawncau Aux Mose ka maix khawmuik heue. Paw doh veeh tix ka plak dawm mai ka plak giox khaing ceu ankix, sonsang pon maix ti haokhuan ting lhaong ka can dee hu maix kudah heue. <sup>8</sup> Phuk lai pingnyap in tak mawh pa ang chix gah khaing jheeh maix heue. Viang mawh nan, maix tak dohkeud mai phat nawh ku singaix ku sawm sonsang pon hawt maix ti

1:3-5 Pi 11:24-25. 1:5 Pi 31:6, 8, He 13:5. 1:6 Pi 31:6, 7, 23.

yuh awm ceu an khankix, pa hoik tiem dauh an khawmuik heue. Grawh grawng nawh, mawh pa yuh maix haokhuan ting lhaong mai khaix an maix tak koe krax pa pex ka dauh ceu pa mhawm heue. <sup>9</sup> Aux hoik tawm ka maix ang mawh lie? Teei riang rao tix mai kieh koe rhawm kua dauh ceu pa mhawm heue. Paw doh kieh koe krax lhatgraung mai paw koe krax lauxrhawm awx. Grawh grawng nawh, Simiang Siyiex maix mawh pa ot tau mai maix ka can dee hu maix ku dah heue.”

### *Tiang Rawm Klawng Yawdan*

<sup>10</sup> Khaix an, Yawsux tawm lox ka cao kaing pui khankix ah nin, <sup>11</sup> “Hu vungviang ti jhak mai ah nin ka pui khankix, coxkhre ti priex krax pa ih son tokaux pex. Grawh grawng nawh, ka dauh loe ngaix pex tak tiang ti hu ka plak toi rawm klawng Yawdan in sonsang pon hu teei pex ti cie haktiex pa sang tawx Simiang Siyiex ka pex heue. <sup>12</sup> Son ceucad Rubin, son ceucad Gat mai son ceucad Manashe khankix tix plak, Yawsux kraik ka kix ah nin, <sup>13</sup> deeh dohkeud ka lox pa hoik tawm kawncau Simiang Siyiex pa mawh Mose ka pex, pa hoik ah nin, Simiang Siyiex pex tak sang tawx pex lauxlee tix mai Nawh Cao tak sang tawx haktiex in ka pex heue. <sup>14</sup> Moeng pex khankix, kawn nyawm iak pex khankix, to briex eei pex khankix tak sang mawh pa prah ti ot ka dauh haktiex pa hoik tawx Mose ka pex ka plak sivoie rawm klawng Yawdan heue. Pex tak tiang ti hu ka plak sivoie kru naing puxaik pex khankix tau mai pui pa ting riang rao pa koe rhawm vao rhawm kua mai hu teem ka kix, <sup>15</sup> tom hoek bawgyam hoik tawx Simiang Siyiex puxaik pex khankix lauxlee tix, awm krax pa hoik tawx Nawh Cao ka pex heue. Kix hoik mawh pa hoik teei ti cie haktiex pa sang tawx Simiang Siyiex pex ka kix heue. Khaix an, pex tak deeh ing ka haktiex cie tix mai koe krax gauxrhawm ka

daux haktiex an pa hoik tawx kawncau Simiang Siyiex Mose ka pex plak lih singaix hawt rawm klawng Yawdan heue.”<sup>16</sup> Kix deeh pawk lox Yawsux ah nin, “Yix tak yuh ceu ankix pa tawm maix ka yix mai yix tak hu ka dee pa sang ploï maix yix hu kudah heue.”<sup>17</sup> Awm krax pa hoik cu nghiet yix ka Mose ka daux grawng kuceu, yix tak nghiet ka maix heue. Kieh Simiang Siyiex maix ot tau mai maix awm hoik ot Nawh Cao tau mai Mose heue.<sup>18</sup> Can pui pa tiehfeen ka lox tawm maix mai pa ang cu nghiet ka lox tawm maix khankix ka nawh tak kieh nawh yum heue. Teei riang rao tix mai kieh koe rhawm kua ka daux ceu pa mhawm heue.”

## **2 Rahap Mox Ka Pui Jiang**

Yam in, Yawsux pa mawh kawm simex Nun, mox ti ploï pui ra kaux lih hu khaing veng Shittim, sonsang liiem ti jiang mai nawh ah nin ka kiex. “Hu jhak ti yaox ka haktiex mai veng Yerikho.” Mawh kheu nan kiex hoek ka daux nyiex Rahap pa mawh sibun coh kaux mai peung daux nyiex nawh heue.<sup>2</sup> Pui haktiex tixblah hu kraï grawng ankix ka simiang veng Yerikho mai kix ah nin. “Jhak heue, pui pa hoek tin ka daux sawm in mawh pa kaoh khaing kawm praix Isarelax khankix sonsang sawgti jhak ka daux haktiex heue.”<sup>3</sup> Mawh kheu nan, simiang Yerikho kok ka Rahap ah nin ka nawh, “Viex pui ankiex pa hoek ka daux nyiex maix lih, kheu kiex hoik hoek ti sawg jiang ka haktiex khawmuik.”<sup>4</sup> Sibun an hoik teei ti mox pui an kiex ra kaux mai ah nin, “Mawh heue, pui ankiex hoik hoek ka aux, viang mawh nan, ang aux tawng dee kaoh kiex,<sup>5</sup> pui ankiex hoik lih hu plak mawx aux ang tawng. Niied pex hawt pheet kiex phaiphai liak, pex tak kawm krup kiex heue.” Ceu ankix hoik lih ti mawh, awm khaix hoik nyeeep kix siviex veng yam hoik hoek bawgyam faik praix.<sup>6</sup> Viang mawh nan, nawh hoik viex kiex haok ka piang braux nyiex mai mox kiex ka daux sinax gawng khaox gan pa hoik priex nawh ti deuh ka piang braux nyiex heue.<sup>7</sup>

Khaix an pui khankix hawt pheet kiex ka

1:12-15 Si 32:28-32, Pi 3:18-20, Yaw 22:1-6. 2:10 Lih 14:21, Si 21:21-35.

diang tiang kix rawm klawng Yawdan, khaix hoik lih hu pui khankix pa hawt pheet kiex dommawx doman kix song ka siviex veng heue.<sup>8</sup> Sivoë ang pui pa jiang ankiex nyang laig it, sibun an haok ka piang braux nyiex<sup>9</sup> mai nawh ah nin ka pui ankiex, “Aux tawng ka hoik tawx Simiang Siyiex haktiex in ka pex mai krax pa lhatgraung khaing pex, hoik lih ti hoek ka piang yix sonsang khруп rhawm pui pa ot hawt baoh in sivoë pex heue.<sup>10</sup> Mawh kheu yix hoik mhong ka yuh Simiang Siyiex rawm sigrit sigra raoh hit sivoë pex yam lih hu pex khaing Ejiptux mai grawng krax pa hoik yuh pex ka simiang haktiex Amawrix ra kaux pa ot ka plak praok toi rawm klawng Yawdan plak an, pa mawh simiang Sihung mai simiang Awgax pa hoik yuh pex kix lauxleeing khawmuik heue.<sup>11</sup> Khaix hoik mhong yix ka grawng ceu in khankix, rhawm yix hoik koe krax pa khруп rhawm mai krax pa vao rhawm ang lai koe pie tix kaux kawx ka daux sinax yix kheu jao pex heue. Mawh kheu Simiang Siyiex pex, mawh Simiang Siyiex piang raoma mai ka piang haktiex khawm greem haktiex heue.<sup>12</sup> Mawh kheu nan, yam in aux khioxkhaw ka pax mai simie pax tiextu ka Siyiex awm hoik jhi aux krax pa cauxrhawm tix ka pax, sonsang deeh jhi pax krax pa cauxrhawm tix ka nyiexma keeing aux mai tawx mhai pa rug ka aux tix ceu<sup>13</sup> mai son ang pex sang pah miex keeing aux, puxaik puxo aux khankix mai canceu pa koe kix khawmuik mai tawx krax pa lawdluan ka ju yix khaing krax yum liak.”<sup>14</sup> Pui ankiex, deeh pawk lox ka nawh ah nin, “Phan pex tix kaux kaux ang kraï grawng kaing pa yuh yix, ju yix tak mawh son ju maix heue. Ceu ankix tak lih ti koe yam hoik tawx Simiang Siyiex haktiex ka yix heue. Yix tak kham ti tawx lox sijax pa cauxrhawm ka son maix heue.”<sup>15</sup> Khaix an nawh ploï kiex lih ka maox tix nyaing khaing daux siviex vawng kheu koe nyiex nawh ka piang guh veng mai nawh ot daux guh veng an heue.<sup>16</sup> Nawh deeh ah nin ka kiex, “Niied pax to ti hu ka piang gawng, hax pui pa hawt pheet khankix yaox ka pax, Mox pax tan loe ngaix tom hoek bawgyam deeh ing pui pa hawt pheet ka pax. Khaix hoik ceu an khankix pax tak

pon ti hu krax hu tix heue.”<sup>17</sup> Khaix an, pui ankiex deeh ah nin ka sibun an, “Kieh yiex mawh pa ang pon pa deuh phimap kheu lox pa hoik kieh maix yiex tiextu kah heue.”<sup>18</sup> Yam hoek yix ka dauh haktiex in sax maix phiawk ti deuh maox raoh pa lang in ka dauh diang siviex vawng pa hoik kieh maix yiex lih hu. Maix tak khrawm miex keeing maix, puxaik puxo maix mai can pui pa koe ka dauh nyiexma miex keeing maix khawmuik hoek ti ot ka dauh nyiex maix heue.<sup>19</sup> Yam an, phan pui tix kaux kaux lih hu khaing diang siviex nyiex maix plak praix dauh krax mai phan nawh yum, phimap nham nawh tak mawh pa koe ka piang kaing nawh mai yix tak mawh pa ang koe dee deuh phimapkah, viang mawh nan phan taix pui krox teeh ka pui pa ot ka dauh nyiex maix tix kaux kaux, nham nawh tak mawh pa koe ka piang kaing yix heue.<sup>20</sup> Phan maix kraik grawng kaing pa yuh yix in, yiex tak mawh pa lawdluan khaing grawng pa hoik tiextu maix ka yiex heue.”<sup>21</sup> Sibun an deeh ah nin, “Kieh mawh awm lox pa kraik pax.” Khaix an, nawh ploi kiex hu mai kix goih paox tix mai nawh teei maox raoh phiawk ka dauh diang siviex vawng heue.<sup>22</sup> Khaix hoik goih kix paox tix, kiex hu ka piang gawng mai ot tan been loe ngaix tom hoek bawgyam deeh ing pui pa hawt pheet kiex, kheu pui pa hawt pheet kiex khankix sawg ti yaox kiex ku dah kawx, kix ang yaox ka kiex heue.<sup>23</sup> Mawh kheu nan, pui ankiex ra kaux lih khaing gawng mai deeh ing hoek ka Yawsux pa mawh kawn simex Nun mai kiex kraik nawh mhong grawng ceu pa hoik lih mawh piang kiex mai<sup>24</sup> kiex ah nin ka Yawsux, “Simiang Siyiex hoik ap ti tawx haktiex an khankix khawmuik ka dauh taix ex tete, grawh grawng nawh, can pui pa ot ka dauh haktiex an khankix, hoik khrup rhawm kheu jao ex heue.”

### **3 Pui Isarelax Tiang Rawm Yawdan**

Yawsux kaoh ponngawb caocao mai lih khaing veng Shittim mai hoek ka rawm klawng Yawdan tau mai kawn praix ceu pui Isarelax khankix mai kix peung tan sivoie sangtiangkixplaktoi rawm.<sup>2</sup> Khaix hoik luan dauh loe ngaix mai cao kaingnaingkhankix

hu lailing ti jhak ka dee bang kix<sup>3</sup> mai kix tawx lox tix ka pui khankix ah nin, “Yam yaox pex cao giex kaing li pa mawh ceucad Lewix, klawm teug buan sijax mukheu Simiang Siyiex pex, pex tak lih hu khaing dee ot pex mai hawt khaix kix,<sup>4</sup> Viang mawh nan, teug buan sijax mukheu takkhan sinax pexra rheng sawk awm pa hoik tiag ti deuh, sonsang tawng pex dauh krax pa sang hu tix, pex paw doh hawt dex nawh heue. Mawh kheu ang pex nyang sax hu dauh krax in glang ka singaix pa luan.”<sup>5</sup> Yawsux deeh ah nin ka pui khankix, “Yuh tokaux pex singax, mawh kheu Simiang Siyiex tak yuh ceu pa dao deng khankix ka sinax pex pasax.”<sup>6</sup> Yawsux kok ka cao giex kaing li khankix ah nin, “Klawm teug buan sijax mukheu mai tiang ti hu ka plak sivoie pui hun khankix heue.” Kix yaog ti klawm teug buan sijax mukheu mai hu sivoie pui hun khankix heue.<sup>7</sup> Simiang Siyiex deeh ah nin ka Yawsux, “In singaix Aux tak jah ti yaog maix ting ka plak sivoie kawn praix ceu pui Isarelax khankix, sonsang tawng kix ka ceu an kix, awm hoik ot tau Aux mai Mose, Aux tak ot tau mai maix heue.”<sup>8</sup> Maix tak tawm lox ka cao giex kaing li pa klawm teug buan sijax mukheu mai ah nin, “Yam hoik lih hoek pex ka praok rawm klawng Yawdan, pex tak cung ka dauh rawm klawng Yawdan heue.”<sup>9</sup> Mawh kheu nan, Yawsux ah nin ka kawn praix ceu pui Isarelax khankix, “Hoek ti nghiet ka gumlox Simiang Siyiex pex.”<sup>10</sup> Yawsux baoh ah nin, “Ka grawng ceu inkix pex tak tawng Simiang Siyiex pa im ju koe dauh sinax pex mai Nawh Cao tak grheu ti tik ceu pui Khanan, ceu pui Hitix, ceu pui Hiwix, ceu pui Pherazix, ceu pui Giragashix, ceu pui Amawrix mai ceu pui Yebusix khankix khaing plak sivoie pex heue.<sup>11</sup> Jhak heue, teug buan sijax mukheu Simiang Siyiex pa giex kuang ka piang ca haktiex khawmuik tak sang tiang ti hu sivoie pex ka dauh rawm klawng Yawdan heue.”<sup>12</sup> Mawh kheu nan, yam in laug ti teei pui kao ra kaux khaing dauh doehru pui Isarelax khankix tix ceu tix kaux heue.<sup>13</sup> Khaix hoik luan bawgyam an, yam diag caong cao giex kaing li khankix pa klawm teug buan sijax mukheu Simiang Siyiex

pa giex kuang ka piang ca haktiex khawmuik dig ka dauw rawm klawng Yawdan, dommawx doman rawm pa lih khaing plak laong tak dud mai rawm khankix kaog mai jhu ti haok heue. <sup>14</sup> Khaix hoik ceu an khankix, yamli hu pui khankix khaing dee bang kix sonsang tiang ti hu ka plak toi rawm klawng Yawdan, cao giex kaing li khankix klawm ka teug buan sijax mukheu mai hu sivoie pui hun <sup>15</sup> mai yam hoek pui pa klawm teug khankix ka rawm klawng Yawdan mai yam cao giex kaing li pa klawm teug khankix dig tiag caong tix ka dauw rawm pa kreh, grawh grawngnawh, dauw yam vawg nghox mawh bawgyam pa yie kreh rawm klawng Yawdan, <sup>16</sup> rawm pa lih hoek khaing plak laong kaog ti cung mai yaog ti haok hu tom hoek hawt veng Adam pa koe praok veng Zaratan mai can rawm khankix lih hu ka dauw rawm sigrit sigra Ariba pa mawh rawm sigrit sigra kih mai rawm khankix hoik dud, pui hun khankix tiang ti hu khaing plak veng Yerikho heue. <sup>17</sup> Yam cao giex kaing li khankix pa klawm teug buan sijax mukheu Siyiex, cung sijung ka piang dee kroh tiex ka dauw sigreung rawm klawng Yawdan mai pui Isarela x khankix tiang ti hu ka piang dee kroh tiex tom hoik uik tiang pui khankix khawmuik ka plak toi rawm klawng Yawdan heue.

#### ***Simaox Pa Dohkeud***

**4** Khaix hoik uik tiang pui hun khawmuik plak toi rawm klawng Yawdan, Simiang Siyiex deeh ah nin ka Yawsux. <sup>2</sup> "Laug ti teei pui kao ra kaux khaingdauw doehru kix tix ceu tix kaux. <sup>3</sup> Tawm lox ah nin ka kix, teei lon simaox kao ra lon son tokauw pex khaing sigreung rawm klawng Yawdan, khaing dee cung cao giex kaing li khankix mai viex ankix tau mai pex mai deuh ankix ka dee peung pex ka dauw sawm in heue." <sup>4</sup> Khaix an, Yawsux kok ka pui kao ra kaux pa hoik tawx nawh beeh glawm khaing dauw kawn praix ceu pui Isarela x khankix tix ceu tix kaux khaing doehru kix, <sup>5</sup> Yawsux deeh ah nin ka kix, "Tiang ti hu ka plak sivoie teug buan sijax mukheu Simiang Siyiex pex ka dauw sigreung rawm klawng Yawdan mai pui tix

kaux khaing dauw pex tak teei ti viex simaox tix lon ka piang klip nawh awm pa simin ti deuh khaing dauw doehru kawn praix ceu pui Isarela x khankix, <sup>6</sup> sonsang mawh in mhairug tix ceu ka dauw sinax pex, yam chaw kawn praix pex ka dauw bawgyam pa sang hoek khaix in sax mai kix tak ah nin, dee bleeh grawng lon simaox inkix mawh ceu patix ka son ex lie? <sup>7</sup> Khaix an pex tak deeh pawk lox kix mai kra i grawng krax pa hoik dud rawm klawng Yawdan ka plak sivoie teug buan sijax mukheu Siyiex yam tiang ka plak toi rawm klawng Yawdan, rawm khankix hoik mawh pa tat ti deuh mee heue." Lon simaox inkix tak mawh son krax pa dohkeud tix ceu ka son kawn praix ceu pui Isarela x khankix leeingju heue. <sup>8</sup> Kawn praix ceu pui Isarela x khankix hawt ti yuh awm gumlox pa hoik tawm Yawsux mai kix yaog ti viex lon simaox kao ra lon khaing dauw sigreung rawm klawng Yawdan awm lox pa hoik kra i Simiang Siyiex ka Yawsux heue. Awm pa hoik simin kix ti deuh ka doehru kawn praix Isarela x khankix, hoik yaog ti viex lon simaox an khankix tau mai tix ka plak toi rawm mai deuh ankix ka dee peung kix tan heue. <sup>9</sup> Khaix an, Yawsux hu teei ti deuh simaox an kao ra lon ka dauw sigreung rawm klawng Yawdan, ka dee hoik cung cao giex kaing li pa klawm teug buan sijax mukheu mai lon simaox ankix mawh pa koe ka dee an tom in singaix heue. <sup>10</sup> Mawh kheu nan, cao giex kaing li khankix pa klawm teug buan hoik cung ti ot sigreung rawm klawng Yawdan tom hoik bawgyam hoik yuh kix kuceu, awm pa hoik tawm Simiang Siyiex ka Yawsux sonsang kra i nawh ka pui khankix awm pa hoik tawm Mose khankix khawmuik ka Yawsux heue. Pui khankix niied ti hu mai tiang ka plak toi rawm heue. <sup>11</sup> Khaix hoik luan bawgyam an khankix mai khaix hoik tiang pui khankix ka plak toi rawm khawmuik, teug buan sijax mukheu Simiang Siyiex mai cao giex kaing li khankix tiang ti hu ka toi plak an ka plak sivoie ngai pui khankix heue. <sup>12</sup> Cub ceucad Rubin, cub ceucad Gat, cub ceucad Manashe khankix tix plak hoik tiang ti hu plak an tau mai kru naing tix ka plak sivoie kawn praix Isarela x khankix awm pa hoik sikah

Mose ka kix heue. <sup>13</sup>Can pui khankix pa hoik khrerientipuingnaing koe pon mheen kaux, hoik tiang ti hu ka toi plak an ka sivoie Siyiex, ka daux lung haktiex veng Yerikho sonsang yuh naing heue. <sup>14</sup>Ka daux singaix an, Simiang Siyiex hoik yaog Yawsux ting plak sivoie ngai kawn praix ceu pui Isarelix khankix mai kix hoik koe krax lhatgraungka nawh awm hoik lhatgraung kix ka Mose ka daux singaix glang kawn im ju nawh khawmuik heue. <sup>15</sup>Khaix an, Simiang Siyiex sikah ka Yawsux ah nin, <sup>16</sup>“Tawx lox maix ka cao giex kaing likhankix paklawm teug buan pa kham mhairug sonsang lih kix khaing daux rawm klawng Yawdan heue.” <sup>17</sup>Yawsux tawx lox tix ka cao giex kaing li khankix ah nin, “Lih khaing daux rawm klawng Yawdan.” <sup>18</sup>Khaix hoik luan ceu an khankix, yam hoik haok cao giex kaing li khankix pa klawm teug buan sijax mukheu Siyiex khaing daux sigreung rawm klawng Yawdan mai yam hoik dig caong cao giex kaing li ka dee kroh tiex, rawm klawng Yawdan deeh lih hu ka dee hoik koe tix mai lihkheem tomkrapraokkhankixawmphaoka heue. <sup>19</sup>Pui khankix hoik haok khaing daux rawm klawng Yawdan ka daux khix tix kao ngaix mai kix hu bang baoh Gilagalax pa koe mee haktiex plaktoh khaingvengYerikho heue. <sup>20</sup>Lon simaox an kao ra lon khankix, pa hoik tee kix lih khaing daux rawm klawng Yawdan, Yawsux deeh tee ankix mai sum ti deuh ka daux haktiex Gilagalax. <sup>21</sup>Khaix an, nawh deeh ah nin ka ceu pui Isarelix khankix, “Yam chaw kawn praix grawng ceu in ka keeing tix bawgyam singaix pa sang hoek sax, kix tak ah nin, lon simaox inkix mawh grawng ceu patix lie?” <sup>22</sup>Khaix an, pex tak kieh kawn praix pex khankix tawng mai ah nin ka kix, ceu pui Isarelix khankix hoik tiang ti hu ka daux rawm klawng Yawdan ka piang dee kroh tiex heue. <sup>23</sup>Mawh kheu Simiang Siyiex pex hoik yuh rawm pa koe daux rawm klawng Yawdan hit ka plak sivoie pex, tom hoik tiang pex ti hu ka toi plak an awm hoik yuh Simiang Siyiex pex ka rawm sigrit sigra raoh, pa yuh Nawh Cao hit 5:6 Si 14:28-35. 5:10 Lih 12:1-13. 5:12 Lih 16:35.

ka plak sivoie yix, tom hoik hoek bawgyam hoik tiang ex ti hu. <sup>24</sup>Sonsang tawng pui haktiex khankix ka plawng taix Simiang Siyiex mawh pa ting siawb sibrawm mai sonsang koe krax lhatgraung ka Simiang Siyiex pex leeingju heue.”

## **5 Doehru Isarelix Pat Hak**

**5**Mawh kheu nan, ceu ankix hoik lih ti koe, yam hoik mhong simiang haktiex Amawrix pa ot ka plak klip rawm klawng Yawdan, nawh kraixkhrum simiang haktiex baoh haktiex Khanan, pa ot hawt rawm sigrit sigra khankix, kheu hoik mhong nawh ka hoik yuh Simiang Siyiex rawm klawng Yawdan hit ka plak sivoie kawn praix Isarelix khankix mai kieh rawm kaog tom hoek bawgyam hoik tiang kix ti hu ka plak toi klawng, kix hoik koe krax pa khruprhawm mai rhawm vao rhawm kua kix ang lai koe ka daux kix kheu jao kawn praix ceu pui Isarelix khankix heue. <sup>2</sup>Ka daux bawgyam an, Simiang Siyiex deeh ah nin ka Yawsux. “Yuh gawn simaox lawm mai baox deeh pat hak kawn simex ceu pui Isarelix khankix ra bawg tix bawg heue.” <sup>3</sup>Mawh kheu nan, Yawsux hoik yuh gawn simaox lawm khankix mai deeh pat hak kawn simex ceu pui Isarelix khankix hawt gawng dee pat kix hak heue. <sup>4</sup>In mawh grawng pat Yawsux hak kix, kheu can pui pa lih hoek khaing daux haktiex Ejiptux khawmuik pa mawh simex mai pui naing khankix hoik yum ka daux tiag hawt krax khaix hoik lih hoek kix haktiex Ejiptux heue. <sup>5</sup>Grawh grawng nawh, ceu pui pa hoik lih hoek khaing daux haktiex Ejiptux khankix hoik mawh pa hoik pat hak tix, viang mawh nan, can pui pa hoik keh ka daux tiag hawt krax khawmuik, ang nyang bax pat hak tix awm pa lih hoek kix khaing daux meung Ejiptux heue. <sup>6</sup>Mawh kheu hoik vungviang kawn praix ceu pui Isarelix khankix ka daux tiag been tixpon num, can pa mawh pui naing khankix pa lih khaing daux haktiex Ejiptux hoik lauxlak pakleeing khawmuik heue. Mawh kheu kix ang cu nghiet gumlox pa hoik tiextu Simiang Siyiex khankix, son ang kix pon hoek ka daux haktiex pa hoik tiextu Simiang Siyiex ti tawx

ka keeing kix mai pa sang tawx ka ex pa mawh haktiex dee lih rawm teeih mai rawm hia khankix heue. <sup>7</sup>Mawh kheu nan, Yawsux pat hak kawn simex kix khawmuik tang kix pa hoik yum hawt krax mai kheu jao ang kix nyang bax pat haktix heue. <sup>8</sup>Khaix hoik pat pui khankix hak tix khawmuik, kix ot daux nyiex bang dee ot tix tom hoek bawgyam pon kix tix deeh moi heue. <sup>9</sup> Khaix an, Simiang Siyiex deeh ah nin ka Yawsux, “Ka daux in singaix, Aux hoik teei ti tik ceu pa sibriem meung Ejiptux khankix khaing pex heue.” Mawh kheu nan, hoik kok ceukaux dee in mawh Gilagalax tom in singaix heue. <sup>10</sup>Yam ceu pui Isarelax khankix bang ti ot daux Gilagalax, ka daux khix an kao pon ngaix plakbo kix yuh pawie Pasakha daux lung veng Yerikho heue. <sup>11</sup>Khaix hoik pawie Pasakha daux ngaix pasax, kix ih ceu pa pon kix khaing tiex, blah pa ang sau susaix mai gaox nghox ca pa hoik sin khankix daux tix ngaix khaing heue. <sup>12</sup>Kheu hoik ih kix ceu pa pon tix khaing haktiex Khanan, blah mannaux hoik cud son kix, khaix an kawn praix ceu pui Isarelax khankix ang lai pon mannaux tix bawg kawx, viang mawh nan, kix yaox ti ih plix khaox pa pon kix khaing haktiex Khanan daux num an heue.

### ***Cao Kaing Kru Naing Siyiex***

<sup>13</sup>Yam ot Yawsux hawt veng Yerikho, nawh maong ti jhak mai jhak heue, pui tix kauxcung ka plak sivoie nawh mai giex vaid lawm ka daux taix tix mai Yawsux hu ah nin, “Maix mawh pui plak yix, phan ang mawh nan, pui plak pui koeng yix lie?” <sup>14</sup>Nawh dee ah nin, “Ang mawh, Aux mawh cao kaing kru naing Simiang Siyiex tix kaux, Aux hoik hoek yam in heue.” Yawsux gup pakngai tix ka piang tiex mai krub ka Nawh Cao mai deeh ah nin ka Nawh, “Simiang aux eue, sang ah maix patix ka kawncau Maix lie?” <sup>15</sup> Cao kaing kru naing Simiang Siyiex deeh ah nin ka Yawsux, “Peeik kiep maix khaing caong maix, mawh kheu dee cung maix in, mawh pa singax.” Yawsux hawt ti yuh awm an heue.

5:10 Lih 12:1-13. 5:12 Lih 16:35.

**6** ***Grawng Laux Veng Yerikho***  
 Yam in, kheu jao ceu pui Isarelax veng Yerikho hoik nyep tom kriemkre mai pui laig pui lih ang lai koe pie tix kaux kawx. <sup>2</sup> Simiang Siyiex ah nin ka Yawsux, “Aux hoik tawx veng Yerikho ka daux tawm taix maix, khawm simiang nawh mai khawm pui naing pa ting riang nawh khankix khawmuik. <sup>3</sup> Maix mai pui naing khankix tak hu lailawm ti cawng hawt vungviang veng an tix ngaix tix bawg mai maix tak yuh awm in tom sidah liah ngaix heue. <sup>4</sup> Cao giex kaing li aliah kaux tak teei ti viex teettawng rung yung mhaing khankix ka plak sivoie teug buan sijax mukheu heue. Yam hoek ka daux aliah ngaix maix tak lailawm ti cawng hawt vungviang veng aliah bawg mai cao giex kaing li khankix tak phlu teettawng heue. <sup>5</sup> Yam phlu kix teettawng rung yung mhaing tom rheeng mai yam mhong pex lox teettawng, pui khankix tak yolox tix tau mai lox pa kied ting sinum, dommawx domanguh veng tak khrup mai pui khankix tak yaog ti haok plak sivoie kukaux heue.” <sup>6</sup> Mawh kheu nan, Yawsux pa mawh kawn simex Nun, kok ka cao giex kaing li ah nin ka kix, “Yaog ti klawm teug buan sijax mukheu mai kieh cao giex kaing li aliah kaux viex teettawng pa yuh ka rung yung mhaing khankix aliah mu mai hu ka plak sivoie teug buan sijax mukheu Simiang Siyiex heue.” <sup>7</sup> Nawh baoux ah nin ka pui khankix, “Hu plak sivoie mai lailawm ti cawng hawt vungviang veng mai kieh pui pa giex kraung naing khankix hu plak sivoie teug sijax mukheu Simiang Siyiex heue.” <sup>8</sup> Yam hoik krai Yawsux ka pui khankix mai cao giex kaing li pa viex teettawng rung yung mhaing khankix pa koe ka plak sivoie Simiang Siyiex, lih hu plak sivoie mai phlu teettawng khankix, teug buan sijax mukheu Simiang Siyiex tak hawt ka plak khaix kix. <sup>9</sup> Pui pa giex kraung naing khankix lih hu ka plak sivoie cao giex kaing li pa phlu teettawng khankix, glang kawn phlu cao giex kaing li kix teettawng cub lien pa pau plak khaix hawt hu khaix teug buan heue. <sup>10</sup> Yawsux tawm lox ah nin, “Ang pon ti lih lox, ang pon ti yolox tix, ang pon ti sikah tom hoek bawgyam singaix pa kieh aux pex deeh

yolox tix, khaix an pex tak pon yolox tix heue.”<sup>11</sup> Mawh kheu nan, nawh kieh teug buan sijax mukheu Simiang Siyiex cawng ka veng mai hu hawt vungviang veng been tix bawg heue. Khaix an, kix hoek kadee nyiex bang tix mai peung daux nyiex bang an tix sawm heue.<sup>12</sup> Yawsux kaoh ponngawb caocao mai cao giex kaing li khankix yaog ti klawm teug buan sijax mukheu Simiang Siyiex heue.<sup>13</sup> Cao giex kaing li aliah kaux pa viex ka rung teettawng yung mhaing aliah mu, niied ti hu ka plak sivoe teug buan sijax mukheu Siyiex mai phlu teettawng khankix luah heue. Pui pa giex kraung naing khankix hu sivoe kix mai cub lien pa pau plak khaix khankix hawt ti hu ka plak khaix teug buan glang kawn phlu cao giex kaing li khankix teettawng heue.<sup>14</sup> Ka daux ra ngaix tix ngaix, kix baox lih hu mai lailawm ti cawng hawt vungviang veng baox tix bawg mai kix deeh ing ka nyiex bang tix heue. Mawh kheu nan kix yuh ceu ankix tom naog liah ngaix heue.<sup>15</sup> Yam hoik naog aliah ngaix, kix kaoh caocao yam bah rieng praix mai kix lih hu lailawm ti cawng hawt vungviang veng aliah bawg awm pa hoik yuh kix, kix lailawm ti cawng hawt vungviang veng aliah bawg ka daux ngaix an tix ngaix ngie heue.<sup>16</sup> Yam hoik naog aliah bawg, yam cao giex kaing li phlu teettawng, Yawsux ah nin ka pui khankix, “Yolox heue, grawh grawng nawh, Simiang Siyiex hoik tawx veng in ka pex.<sup>17</sup> Yam in veng an mai can pa koe ka daux nawh khankix, tak hoek krax laux sivoe Simiang Siyiex heue. Mawh ngie Rahap pa mawh bun pa coh kaux pa pon ti im ju khawm tau mai can pui pa koe daux nyiex nawh khankix, kheu jao hoik mox nawh kawncaw pa hoik ploiex heue.<sup>18</sup> Pex rien rhawm ka kraung pa sang kieh pon krax pa jhaxlawg khankix, phan ang mawh nan, yam teei pex ceu pa hoik jhaxlawg khankix pex tak hoek ka daux krax pa jhaxlawg mai tak yuh nyiex bang ceu pui Isarelax khankix hoek ka daux krax pa jhaxlawg mai an tak mawh pa khi rawm ka pex heue.<sup>19</sup> Viang mawh nan, can pa mawh mau, khri mai kraung aw, klong pa yuh ka

tawng mai rhiem khankix tak mawh pa deuh singax singeh son Simiang Siyiex, ceu ankix tak mawh pasau ka daux sinngao cie Simiang Siyiex heue.”<sup>20</sup> Mawh kheu nan pui khankix yolox tix mai phlu teettawng heue. Yam hoik mhong pui ka lox teettawng, pui yolox tix tau mai pa kied ting sinum, dommawx doman guh veng khankix khrup khawmuik, khaix an pui kukaux khankix hu laig ka daux veng mai rhim ti teei veng an heue.<sup>21</sup> Kix yuh canceu pa koe daux veng khankix laux khawmuik, khawm simex, sibun, pui awn ju, pui riex ju, mawie, yung mai la khankix khawmuik ka lawm vaid heue.<sup>22</sup> Khaix an Yawsux ah nin ka pui ra kaux pa hoik hu jiang ka haktiex, “Hu ka daux nyiex sibun coh kaux mai viex bun an khawm canceu kraung pa koe nawh khawmuik lih khaing tan awm lox pa hoik tiextu pax ka nawh heue.”<sup>23</sup> Mawh kheu nan, pui awn ju ankiex pa hoik hu jiang ka haktiex, kok ti viex Rahap khawm miex keeing nawh, puxaik nawh, canceu pa koe nawh khankix mai viex paox nyiex nawh khankix lih hu mai deuh kix ka plak praix dee bang ceu pui Isarelax khankix heue.<sup>24</sup> Khaix an, kix gleeing veng mai can pa koe ka daux an khawmuik ka ngu, mawh khri, mau mai kraung aw, klong pa yuh ka tawng mai rhiem khankix ngie khaing pa sau kix laig ka daux sinngao nyiex buan Simiang Siyiex heue.<sup>25</sup> Yawsux tawx krax klawd ju ka Rahap, pa mawh sibun coh kaux mai pui daux nyiexma keeing nawh mai khawm canceu pa koe nawh khawmuik, nawh ot mai ceu pui Isarelax khankix tom hoek ka daux in singaix mawh kheu hoik mox nawh ti deuh kawncaw pa hoik ploi Yawsux hu jiang ti yaox ka veng Yerikho heue.<sup>26</sup> Khaix an, Yawsux tiextu ka kix ka daux bawgyam an ah nin, “Kieh pa jhaxlawg koe ka piang kaw pa yaog ti kaoh mai deeh sum ka veng in pa mawh veng Yerikho, ka plak sivoe ngai Siyiex yam sum nawh num riah veng an nawh tak mawh pa som ka kawn Ai tix, yam sum nawh ka siviex guh veng, nawh tak som kawn ghoik tau nawh heue.”<sup>27</sup> Mawh kheu nan, Simiang Siyiex hoik ot tau mai Yawsux

mai pa ao min nawh hoik tah hu ka daux haktiex khawmuik heue.

**7** *Grawng Som Kix Ka Veng Ai*  
 Viang mawh nan, kawn praix ceu pui Isarelaux khankix koe krax lud ka ceu pa dex mai kraung pa hoik jhaxlawg tix khankix heue. Akhan pa mawh kawn simex Khamin, kawn saux Zabadiex mai pa mawh kawn sex Zerax, khaing daux doehru ceucad Yudax khankix hoik teei ti viex kraung khri pa jhaxlawg, Simiang Siyiex hoik kied song rhawm ka kawn praix ceu pui Isarelaux khankix. <sup>2</sup>Yawsux deeh ploi pui lih khaing veng YeriKho mai kieh kix hu ka veng Ai, pa koe hawt praok veng Bet-avin mai pa koe hawt praok plak toh khaing veng Betelax mai nawh kraik ka kix ah nin, "Lih hu mai jiang ka haktiex." Mawh kheu nanopui khankix lih hu mai jiang ti yax ka veng Ai heue. <sup>3</sup>Kix deeh ing ka Yawsux ah nin ka nawh, "Paw kieh pui lih hu khawmuik liak! Viang mawh nan, kieh pui hu been ra rheng kaux, phan ang mawh nan, been loe rheng kaux hu puing ka veng Ai heue. Paw kieh pui khawmuik koe krax taug mao tan. Can pui pa ot ka daux veng Ai mawh pa tux. <sup>4</sup>Mawh kheu nan, ploi pui been loe rheng kaux hu khaing daux cubcaw khankix, kix to sivoie pui veng Ai khankix mai <sup>5</sup>pui veng Ai pah ti tik kix been tixgoe liah kaux, kix hawt ti pheet kix, jah ka plak sivoie siviex veng, tom hoek dee singai hawt baoh Shebarim mai kix deeh baoh pah ti tik kix yam lih kix jee caong gawng heue. Mawh kheu nan rhawm kix, hoik lih ti awm rawm heue." <sup>6</sup>Khaix an Yawsux riah ti tik kraung ceep tix mai gup pakngai tix ka piang tiex ka plak sivoie teug buan sijax mukheu Siyiex, tom hoek plak bo nawh khawm kuad riexju Isarelaux khankix mai sau phawng tiex ka piang kaing tix heue. <sup>7</sup>Yawsux deeh ah nin. "O Simiang Siyiex eue, mawh kheu jao patix, Maix lai viex ceu pui inkix pa ot ka plak toi rawm klawng Yawdan, sonsang ap daux tawm taix ceu pui Amawrix sonsang yuh kix yix laux lie? Yix hoik koe krax fahrhawm yam ot yix ka plak an khaing rawm klawng Yawdan. <sup>8</sup>O Simiang Siyiex eue, aux taksang kraik yuh ka mawxyam deeh dak ceu pui Isarelaux khankix plak khaix tix ka

plak sivoie pui pa koeng yix khankix lie? <sup>9</sup>Grawh grawng nawh, ceu pui Khananix khankix mai can pui pa ot ka daux haktiex ankix khawmuik tak mhong ka grawng inkix mai kix tak lailawm ka yix mai teei ti tik min ceukaux yix khaing ka piang ca haktiex in, Maix tak yuh ceu patix son min ceukaux pa kied ting Maix Cao lie?"

### *Grawng Phimap Akhan*

<sup>10</sup>Simiang Siyiex deeh ah nin ka Yawsux, "Kaoh heue, Maix lai gup pakngai tix piang tiex yuh ka mawx lie? <sup>11</sup>Ceu pui Isarelaux khankix hoik yuh phimap mai kix hoik baoh deeh lud ka gumlox sijax mukheu Aux, pa hoik tawm Aux ka kix, kix hoik teei ti viex kraung ceu pa hoik jhaxlawg tix tixblah hoik briex ankix mai deuh ceu ankix ka daux sinax kraung cie kix. <sup>12</sup>Mawh kheu nan, ceu pui Isarelaux khankix ang lai pon cung ti ot ka plak sivoie pui pa koeng kix mai deeh dak plak khaix tix ka plak sivoie pui pa koeng kix, mawh kheu kix hoik mawh pa pon krax pa jhaxlawg ka daux krax pa laux heue. Phan pex an nyang yuh ceu pa jhaxlawg ankix laux khaing daux sinax pex, Aux tak ang lai ot tau mai pex khaix in pie tix bawg kawx heue. <sup>13</sup>Yaog ti kaoh mai yuh pui khankix singax mai ah nin ka kix, yuh tokaux pex singax son pasax, Simiang Siyiex ceu pui Isarelaux hoik ah in, ceu pui Isarelaux khankix eue, kraung pa hoik jhaxlawg koe sinax pex, pex tak ang pon ti cung ka plak sivoie pui koeng pex khankix tom ang pex nyang bax teei ti tik ankix khaing pex heue. <sup>14</sup>Yam hoek ka plak ponngawb, pex tak viex doehru pex khankix, pa mawh doehru pa hoik teei Siyiex ti deuh, tak hoek khawm nyiex tix, khawm kawn nyiexma tix mai khawm kaux pui mawx kaux pui an heue. <sup>15</sup>Can pui pa hoik teei ka kraung pa jhaxlawg, tak mawh pa gleeing titik nawh mai can pa koe nawh khankix khawmuik ka ngu, mawh kheu hoik koe krax pa lud ka gumlox sijax mukheu Simiang Siyiex mai hoik yuh ceu pa kaigtua ka daux ceu pui Isarelaux khankix heue." <sup>16</sup>Mawh kheu nan, Yawsux kaoh plak ponngawb caocao mai viex pui Isarelaux khankix hoek awm pa koe doehru kix mai teei

cub doehru Yudax khankix lih, <sup>17</sup> nawh viex cub geh nyiexma Yudax khankix hoek, nawh baox viex geh nyiexma Zarix khankix hoek kaux pui mawx pui an mai geh nyiexma Zabadix, hoik mawh pa teei tix hoek <sup>18</sup> mai nawh viex kawn nyiexma tix hoek kaux pui mawx pui an mai Akhan kawn simex Khamix, kawn saux Zabadix pa mawh kawn sex Zerax daux doehru Yudax, nawh hoik teei kix hoek heue. <sup>19</sup> Khaix an, Yawsux ah nin ka Akhan. "Kawn simex aux eue, tawx krax yaogyaw ka Simiang Siyiex ceu pui Isarelaux mai kraik grawng pa lud tix ka Nawh Cao heue. Yam in kraik aux mhong ka ceu pa hoik yuh maix, paw doh mox ti deuh ankix khaing aux awx". <sup>20</sup> Akhan deeh pawk lox Yawsux ah nin, "Aux hoik lud ka Simiang Siyiex ceu pui Isarelaux tete mai in mawh ceu pa hoik yuh aux, <sup>21</sup> yam hoik yaox aux kraung pa tudrhim tix pa mawh kraung ceep ceu pui Babulon khawm mau ra yieh Shekhe mai gawng khri tix gawng pa cien been tixphuan Shekhe, aux koe krax ghoing rhawm ka ceu ankix mai teei ti cie, aux hoik mox daux tiex ka daux nyiex gox aux tau mai mau koe plak greem heue." <sup>22</sup> Mawh kheu nan, Yawsux ploi kawncau tix to ti hu ka nyiex gox mai jhak heue, ceu ankix mawh pa hoik mox tix ka daux nyiex gox nawh tau mai mau pa koe plak greem heue. <sup>23</sup> Kix teei ankix khaing daux nyiex gox mai viex hoek ka Yawsux mai ceu pui Isarelaux khankix mai deuh ankix ka plak sivoe Simiang Siyiex heue. <sup>24</sup> Khaix an Yawsux mai pui Isarelaux khankix pa ot tau mai nawh viex Akhan pa mawh kawn sex Zerax khawm mau, kraung ceep, gawng khri, kawn simex kawn sibun nawh khankix, mawie, la, yung, nyiex gox nawh mai canceu pa hoik koe nawh khankix, hoek ka daux ngawd Akhaw heue. <sup>25</sup> Yawsux ah nin, "Maix hoik tawx pa tuktiak ka yix yuh ka mawx lie? Simiang Siyiex tak yuh krax tuktiak ka maix daux in singaix heue." Mawh kheu nan, pui Isarelaux khawmuik dheem nawh yum ka simaox, khaix hoik dheem kix ka simaox, kix gleeing kix ka ngu heue. <sup>26</sup> Khaix an, kix teei simaox khankix mai pum ti deuh ka piang nawh, ankix mawh pa koe

tan tom in singaix. Mawh kheu nan, Simiang Siyiex deeh yoi krax pa songrhawm Nawh Cao khaing piang kix heue. Kheu grawng in, kix kok dahdee an mawh ngawd Akhaw tom singaix heue.

## **8 Grawng Pex Ka Veng Ai**

**8** Khaix an, Simiang Siyiex deeh ah nin ka Yawsux, "Paw lhatgraung, paw lauxrhawm, teei pui naing khawmuik tau mai maix yaog ti hu ka veng Ai, jhak heue, Aux hoik ap ti tawx simiang veng Ai khawm pui nawh khankix, khawm veng nawh mai khawm haktiex nawh ka daux tawm taix pex, <sup>2</sup> maix tak yuh ceu an khankix ka veng Ai mai ka simiang nawh, awm krax pa hoik yuh maix ka veng Yerikho mai ka simiang nawh heue. Maix tak teei ngie kraung pa tudrhim tix khankix mai tobrie nawh khankix nongnong, awm kraung pa tudrhim tix son tokaux pex heue. Rien ti deuh cub pui naing pau ot plak khaix veng awx." <sup>3</sup> Mawh kheu nan, Yawsux yaog ti kaoh tau mai pui naing khawmuik, sonsang hu puing ka veng Ai mai Yawsux laug ti teei pui pa tingriang mai pui vaorhawm been loe mheen kaux mai ploi kix hu plak ponsawm, <sup>4</sup> nawh tawm lox ka kix ah nin, "Jhak heue, pex tak mawh pa pau mai mox ti ot plak khaix veng, paw doh hu singai khaing veng, viang mawh nan, rien rhawm pex khawmuik, <sup>5</sup> aux mai can pui pa ot tau mai aux khawmuik tak hu dee dex hawt veng. Yam hoek kix ti puing ka ex, awm bawg phaoka, ex tak to sivoe kix <sup>6</sup> mai kix tak hawt ti pheet khaix ex tom hoik nyawglaw ex kix lih singai khaing daux veng, son kix tak ah nin, kix hoik to khaing sivoe ex, awm singaix phaoka. Mawh kheu nan ex tak to sivoe kix, <sup>7</sup> khaix an, pex tak yaog ti kaoh khaing dee pau tix mai puing ti teei veng, Mawh kheu Simiang Siyiex pex tak sang ap ti tawx kix daux tawm taix pex heue. <sup>8</sup> Yam hoik rhim pex veng mai pex tak gleeing ti tik veng ka ngu, awm gumlox pa hoik tawm Simiang Siyiex, pex tak yuh awm an heue. Aux tak tawm lox inkix ka pex heue." <sup>9</sup> Mawh kheu nan Yawsux ploi kix hu mai kix hu ka dee pau tix mai mox tix ot hawt sinax veng Betelax mai veng Ai pa koe plak klip veng Ai, viang mawh nan, Yawsux kawn ca ot ka

daux sinax pui khankix ka daux sawm an heue.<sup>10</sup>Yawsux kaoh ponngawb caocao mai simin ti yaox pui khankix mai nawh lih hu tau mai kuad riex ju ceu pui Isarela khankix ka plak sivoie pui hun ka veng Ai heue.<sup>11</sup>Pui naing pa ot tau mai nawh khawmuik niied tix lih hu hoek ka dex veng mai bang ti ot ka plak blaong veng Ai, ngawd tix mu hoik khan sinax kix heue.<sup>12</sup>Mawh kheu nan, nawh teei pui been phuan rheng kaux mai nawh deuh kix yuh pui naing pau hawt daux sinax veng Betelax mai plak klip veng Ai heue.<sup>13</sup>Mawh kheu nan kix khrex ti deuh cub kru naing ot ka plak blaong veng tix cub mai kix deuh pui naing pau ot plak klip veng tix cub, viang mawh nan, Yawsux ot daux ngawd an daux sawm an heue.<sup>14</sup>Yam yaox simiang veng Ai ka ankix, pui pa ot ka daux veng khankix niied ti lih hu ka daux biang naing, khawm nawh mai pui nawh khawmuik ka daux bawgyam pa hoik tinkix ti deuh sonsang yuh naing ka ceu pui Isarela daux lung heue. Viang mawh nan, nawh ang tawng kix hoik koe cub pa yuh naing pau tix cub plak khaix veng heue.<sup>15</sup>Yawsux mai pui Isarela khawmuik yuh ti awm pa hoik som ka plak sivoie kix mai to ti hu daux tiag heue.<sup>16</sup>Mawh kheu nan, pui pa ot ka daux veng Ai khawmuik hoik hawt pheet khaix kix mai khaix Yawsux mai kix hoik hoek dee singai khaing veng heue.<sup>17</sup>Ka daux veng Ai mai veng Betelax, pui pa ang lih hu ti hawt khaix ceu pui Isarela khankix ang lai koe tix kaux kawx mai kix prah veng bhang khaix tix mai hawt pheet khaix ceu pui Isarela heue.<sup>18</sup>Simiang Siyiex deeh baohahnin ka Yawsux, "Nyeu pliah pa koe ka daux taix maix lih ka plak see veng Ai, grawh grawng nawh, Aux tak tawx ankix ka daux tawm taix maix." Yawsux nyeu pliah pa hoik koe ka daux taix tix lih ka plak see veng an heue.<sup>19</sup>Khaix hoik nyeu nawh taix tix dommawx doman, can pui pa yuh naing pau khankix yaog ti lih khaing dee ot kix phaiphai mai kix laig daux veng, rhim ti teei veng mai kix niied ti gleeing veng ka ngu heue.<sup>20</sup>Yam deeh jhak pui veng Ai khankix ka plak khaix tix, Jhak heue, kix yaox taox

ngu khaing veng haok ka raoma, kix ang lai koe riang ti to ka plak in plak an mai pui khawmuik hoik to ti hu ka daux tiag mai deeh veeh ti puing ka pui pa hawt kix heue.<sup>21</sup>Yam hoik yaox Yawsux ka ceu pui Isarela khankix, ka hoik pon rhim pui pa yuh naing pau khankix ka veng mai yam yaox kix ka taox ngu veng pa haok ka raoma, kix deeh veeh tix ka plak khaix mai puing ti tik pui veng Ai khankix heue.<sup>22</sup>Khaix an, pui tang kaux khankix lih hoek khaing daux veng mai hoek ti puing ka kix, mawh kheu nan, kix hoik mawh pa kham ka daux sinax ceu pui Isarela, ka plak in tixblah mai plak an tixblah, pui Isarela khankix pah kix tom ang kix lai klawd pie tix kaux kawx heue.<sup>23</sup>Viang mawh nan, kix pon giex im ka simiang veng Ai mai viex nawh hoek ka Yawsux heue.<sup>24</sup>Yam ghoik pui Isarela ti pah pui veng Ai khankix ka daux lung mai ka daux tiag dee pa hoik hawt pheet kix khaix kix mai yam hoik yum kix ka lawm vaid tom hoik hoek bawgyam hoik laux kix, ceu pui Isarela khankix deeh ing ka veng Ai mai pah kix yum ka lawm vaid heue.<sup>25</sup>Mawh kheupui pa yum ka daux singaix an khawm simex, sibun koe tix mheem ra rheng kaux, kix mawh pui veng Ai khawmuik heue.<sup>26</sup>Yawsux ang nyang deeh yoi taix tix khaing krax pa nyeu nawh pliah pa giex tix, tom hoek bawgyam hoik yuh nawh pui pa ot ka daux veng Ai khankix laux khawmuik heue.<sup>27</sup>Mawh ngie tobrie pa eei kix mai kraung pa tudrhim kix khaing daux veng an khankix, tak mawh pa pon teei pui Isarela ti cie awm kraung pa tudrhim son tokaux kix awm gumlox pa hoik tawm Simiang Siyiex ka Yawsux heue.<sup>28</sup>Mawh kheu nan, Yawsux gleeing ka veng Ai mai yuh an mawh dee pum nyhee pa koe tom hoek in singaix heue.<sup>29</sup>Kix takteue ka simiang veng Ai piang khaox tom hoek plak bo, yam hoik laig singaix, Yawsux tawx lox sonsang deeh teei kix tokaux yum nawh lih khaing piang khaox mai tik nawh hawt krax laig kix ka daux siviex veng mai kix yaog ti pum simaox ka piang tokaux yum nawh, pum simaox ting an koe tom in singaix heue.

### ***Yawsux Plak Jhi Sijax Mukheu***

<sup>30</sup>Khaix an, Yawsux sum khu dee tan tix mu son Simiang Siyiex ceu pui Isarelaax ka piang gawng Ebalax, <sup>31</sup>awm pa hoik tawm Mose pa mawh kawncau Siyiex, ka ceu pui Isarelaax khankix, awm pa hoik tiem ti deuh ka daux phuk lai pingnyap Mose, “Khu dee tan an, mawh pa yuh ka simaox pa ang pui tix kaux kawx nyang sax saik ka kraung rhiem tix ceu kawx,” kix tan krax tan pa gleeing khankix ka piang an son Simiang Siyiex mai khawm krax tan pa appong mai krax tan pa nhim heue. <sup>32</sup>Yawsux tiem ti deuh lox pingnyap Mose ka piang simaox an plak sivoe ngai pui Isarialax, awm pa hoik tiem Mose ti deuh heue. <sup>33</sup> Khaix an, ceu pui Isarelaax pa mawh kuad riex ju, cao kaing naing, cao prawngsee khankix cung ka plak in plak an hawt teug buan sijax mukheu ka plak sivoe cao giex kaing li ceucad Lewix pa klawm teug buan sijax mukheu Siyiex, khawm nyosinie khankix mai can pui nawh pa hoik keh ka daux sinax kix, kix tix plak pa ot ka plak sivoe gawng Gerizim mai tix plak pa ot ka plak sivoe gawng Ebalax, kix nawb buan ka ceu pui Isarelaax khankix awm pa hoik tawm Mose pa mawh kawncau Siyiex glangsingaix pa hoik luan heue. <sup>34</sup> Khaix hoik ceu an khankix, nawh phat gumlox pingnyap khawmuik pa mawh krax pa nawb buan mai pa jhaxlawg khankix khawmuik awm pa hoik tiem ti deuh ka daux phuk lai pingnyap heue. <sup>35</sup> Gumlox pa hoik tawm Mose khankix khawmuik, pa ang Yawsux phat ka plak sivoe cub pui hun tau mai bun khawm kawn nyawm khankix mai sivoe nyosinie pa ot ka daux sinax kix ang lai koe pie tix gum kawx heue.

### ***9 Yuh Paox Pie Mai Pui Gibon***

Yam hoik mhong simiang Hittix, Amawrix, Khananix, Pherazix, Hiwix mai ceu pui Zebuzix khankix pa ot toi rawm klawng Yawdan, pa ot ka piang gawng mai pa ot ka daux lung daux ngawd hawt praok rawm sigrit sigra ting plak see gawng 8:31 Lih 20:25. 8:30-32 Pi 27:2-8. 8:33-35 Pi 11:29, 27:11-14. 9:7 Lih 23:32, 34:12, Pi 7:2. 9:10 Si 21:21-35.

Lebanon khankix, <sup>2</sup>kix kraixkhrawm paox tix tau sonsang puing ka Yawsux mai ka ceu pui Isarelaax khankix tix dom neh heue. <sup>3</sup>Viang mawh nan, can pui pa ot ka daux veng Gibon, hoik mhong ka ceu pa hoik yuh Yawsux kaveng Yerikhomai veng Ai, <sup>4</sup>kixyuh ti awm pa koe cuyi mai yuh ti awm grang cao cau khankix heue. Kix teei chee pa prim khankix mai singien hak rawm plix siiet pa hoik griah mai pa hoik deeh cox caing khankix mai tang ka piang la <sup>5</sup> mai ceep kiep prim pa hoik deeh cox blaax mai ceep kraung prim ka piang tix, blah pa viex kix ti ih daux krax hoik kroh mai hoik moh heue. <sup>6</sup> Kix hu ka Yawsux ka daux bang hawt baoh Gilagalax mai ah nin ka nawh mai ka pui Isarelaax khankix, “Yix hoik kaoh khaing haktiex singai, Mawh kheu nan, pex yuh lox sijax mukheu tau mai yix yam in.” <sup>7</sup> Viang mawh nan, pui Isarelaax deeh ah nin ka pui Hiwix, “Yix tak sang tawng ka ot pex dex sinax yix yuh mai yix tak sang pon ti yuh lox sijax mukheu tau mai pexyuh kamawx?” <sup>8</sup> Kix deeh ah nin ka Yawsux, “Yix mawh siliex maix” mai Yawsux deeh chawk ah nin ka kix, “Pex mawh pui mawx? Pex kaoh khaing dee mawx?” <sup>9</sup> Kix deeh ah nin ka nawh, “Siliex maix khankix mawh pa hoek khaing meung dee singai tix dah, mawh kheu jao yix hoik mhong ka pa ao min ceukaux Simiang Siyiex maix mai canceu pa hoik yuh Nawh Cao ka daux haktiex meung Ejiptux <sup>10</sup> mai canceu pa hoik yuh Nawh Cao ka simiang Amawrix ra kaux pa ot ka plak toi rawm klawng Yawdan mai pa mawh simiang Sihon khaing haktiex Heshabon mai simiang Awgax khaing haktiex Bashan pa ot daux veng Ashatarot heue. <sup>11</sup> Mawh kheu kuad riex ju mai can pui pa ot ka daux haktiex yix khankix hoik krai ka yix ah nin, viex priex preem son pex dauxkrax, hurieb ka kix mai ah nin ka kix, yix mawh siliex maix, hoek pex yuh sijax mukheu tau mai yix yam in liak. <sup>12</sup> In mawh blah pa hoik teei yix ti viex yam kawn si-u, son priex preem pa ih yix khaing daux nyiex yix mai son priex pa ih yix ka daux krax singaix hoik lih hu yix sonsang hoek ka maix, viang mawh nan, yam in jhak heue,

blah ankix hoik kroh mai hoik moh uik mai<sup>13</sup> singiien hak rawm plix siiet inkix pa hoik sau yix ti viex rawm kawx hoik mawh pa khraox yam an nhaox, jhak heue, singiien hak inkix hoik griah mai kraung ceep yix, khawm kiep ceep yix kawx hoik prim kheu jao kied singai krax hoek yix heue.”<sup>14</sup> Mawh kheu nan, pui Isarelax khankix ang lai mhaing akhuang ka Simiang Siyiex mai kix teei ti ih priex preem ankix heue.<sup>15</sup> Mawh kheu nan, Yawsux yuh krax pa nhim tau mai kix mai yuh sijax mukheu tau mai kix sonsang kieh nawh kix klawd ju, can pa kuang ka cub pui hun khankix yuh krax pa tiextu tau mai kix heue.<sup>16</sup> Khaix hoik sidah loe ngaix mai khaix hoik yuh kix sijax mukheu tau mai kix, kixmhongka hoik mawh kix pa ox plawg pa ot hawt dex kix heue.<sup>17</sup> Khaix an, pui Isarelax khankix lih hu krax mai hoek ka veng kix ka daux loe ngaix heue. Yam in, veng pa ot kix mawh veng Gibon, veng Khephirax, veng Berot mai veng Kirayatyrim khankix heue.<sup>18</sup> Viang mawh nan, pui Isarelax khankix ang nyang pah ka kix mawh kheu hoik koe lox pa tiextu cao kaing pa kuang cub pui hun khankix ka kix ka plak sivoe Simiang Siyiex ceu pui Isarelax heue. Cub pui hun khankix hoik ngia mai deuh phimap ka cao pa kuang ka piang kix khawmuik heue.<sup>19</sup> Viang mawh nan, cub cao kaing pa kuang khankix ah nin ka cub pui hun, “Yix hoik koe lox pa tiextu ka kix ka plak sivoe ngai Simiang Siyiex ceu pui Isarelax khankix, ex ang pon ti hu krox hu teeh ka kix yam in heue.<sup>20</sup> In mawh pa tak sang yuh ex ka kix mai kieh kix im ju, phan ang mawh nan, lhat krax songrhawm tak hoek ka piang ex kheu jao ex hoik tiextu mai kix heue.”<sup>21</sup> Cao pa kuang khankix, deeh ah nin ka kix, “Kieh kix im ju heue.” Mawh kheu nan, kix tom lih ti mawh pui pa kid khix mai pui pa kin rawm son pui hun khankix, awm lox pa hoik krai cao kuang khankix ka kix heue.<sup>22</sup> Yawsux kok kix mai ah nin ka kix, “Kheu patix pex hoik pielhen ka yix ah nin, yix mawh pa kied singai dee ot khaing maix mai yam in pex hoik mawh pa ot hawt dex yix ang mawh lie?”<sup>23</sup> Yam in pex hoik mawh pa pon pa

jhaxlawg, mawh kheu nan, pex tixblah tak mawh siliex pa kid khix mai pa kin rawm son nyiex Simiang Siyiex aux jheeng jheeng heue.”<sup>24</sup> Kix deeh pawk lox Yawsux ah nin, “Mawh kheu ceu an hoik mawh pa hoik krai ka siliex maix khankix tom kriem, Simiang Siyiex maix hoik tawm lox ka kawncau Nawh Cao pa mawh Mose, sonsang tawx Nawh Cao haktiex inkix khawmuik ka maix mai sonsang yuh Nawh Cao pui pa ot ka daux haktiex inkix lauxlak pakleeing ka plak sivoe maix, mawh kheu nan, yix hoik kied koe krax lhatgraung ting son ju tix jao maix mai yix hoik pon ti yuh ceu inkix heue.<sup>25</sup> Yam in jhak heue, yix hoik koe ka daux tawm taix maix, yuh ceu pa keud maix mawh pa mhawm mai pa khawcaw pa sang caw maix ti yuh ka yix liak.”<sup>26</sup> Mawh kheu nan, nawh yuh ceu ankix ka piang kix mai deeh ploi kix klawd khaing daux tawm taix pui Isarelax khankix son ang kix lai sang pah kix yum heue.<sup>27</sup> Viang mawh nan, Yawsux kieh kix mawh pui kid khix mai pui kin rawm son cub pui hun khankix mai son khu dee tan Siyiex, ka dee pa laug Nawh Cao tom hoek in singaix heue.

## **10** *Grawng Pa Kaog Singaix*

Yam Adawnizediet pa mawh simiang veng Yerusalieim mhong ka grawng pa hoik rhim Yawsux ka veng Ai mai hoik yuh lauxlak pakleeing yuh ka mawx, awm pa yuh nawh ka veng Yerikho mai simiang nawh, ka veng Ai mai simiang nawh mai grawng pa hoik yuh pui veng Gibon khankix krax pa nhim tau mai ceu pui Isarelax mai ot tau ka daux sinax kix yuh ka mawx,<sup>2</sup> nawh kied koe krax lhatgraung kheu jao hoik mawh Gibon veng pa ting tix veng awm veng pakuang simiang khankix, mawh kheu veng an mawh pa nielheu ting khaing veng Ai mai pui veng khankix hoik mawh pa ting sibrawm riang rao heue.<sup>3</sup> Mawh kheu nan, Adawnizediet simiang veng Yerusalieim ploi pui hu ka Hoham pa mawh simiang veng Hebron, Piram pa mawh simiang veng Yamok, Yaphiya pa mawh simiang veng Lekhisha mai Debirax pa mawh simiang veng Egalon khankix ah nin,<sup>4</sup> “Hoek ka aux mai teem ka aux sonsang pon ex ti

puing ka veng Gibon, kheu kix hoik yuh pa nhim tau mai Yawsux mai ka pui Isarela khankix heue.”<sup>5</sup> Khaix an, simiang Amawrix khankix phuan kaux, simiang Yerusalie, simiang Hebron, simiang Yamok, simiang Egalon, simiang Lekhisha khankix, kraixkhrwam krungaing tix tau mai lih hu ka pui koeng kix mai bang ti ot ka plak sivo veng Gibon sonsang yuh naing ka veng an heue. <sup>6</sup> Pui veng Gibon khankix ploi pui hu ka Yawsux, pa bang ti ot ka veng Gilagalax mai ah nin, “Paw tik vud ka kawn siliex maix khankix liak, niied ti hoek ka yix phaiphai taoh ka yix mai teem ka yix, mawh kheu simiang ceu pui Amawrix khankix pa ot ka piang gawng lua hoik kraixkhrwam paox tix tau mai hoek ti puing ka yix heue.”<sup>7</sup> Mawh kheu nan, Yawsux lih hu khaing veng Gilagalax, khawm pui naing nawh khawmuik tau mai khawm pui pa ting riang pa koe krax kua rhawm khawmuik heue. <sup>8</sup> Simiang Siyiex ah nin ka Yawsux, “Paw lhatgraung ka kix, kheu Aux hoik ap kix ka daux tawm taix maix, pui tix kaux kawx tak ang pon ti cung sivo maix heue.”<sup>9</sup> Mawh kheu nan, Yawsux hoek ka kix dommawx doman mai kix lih khaing baoh Gilagalax hu leeing sawm heue. <sup>10</sup> Simiang Siyiex kieh kix som tomnie plak sivo ceu pui Isarela khankix mai pah kix yum tomnie hawt veng Gibon mai pheet kix hawt krax hu plak veng Biethawron mai pah kix yum tan tom hoek dee singai ka veng Azeka mai veng Makeda heue. <sup>11</sup> Khaix hoik to kix ka plak sivo ceu pui Isarela khankix mai yam lih kix ka jee veng Biethawron, Simiang Siyiex ploi mu preting lih kapiang kix khaing daux raoma tom hoek ka veng Azeka mai kix yum, can pui pa yum ka mu pre khankix kawn baoh nelheu khaing can pa pah pui Isarela khankix ka lawm vaid heue. <sup>12</sup> Khaix an, Yawsux deeh sikah mai Simiang Siyiex ka daux singaix an, yam hoik ap Simiang Siyiex ti tawx ceu pui Amawrix sivo pui Isarela, nawh ah nin ka plak sivo ngai ceu pui Isarela khankix, “Singaix eue, kaog ka piang veng Gibon mai khix eue, kaog ka daux ngawd Ayalon liak.”<sup>13</sup> Mawh

10:13 2Sa 1:18.

kheu nan, singaix kaog tix dah mai khix kaog tix dah tom sidah hoik pawk kix bix tix ka piang pui pa koeng kix khankix heue. In mawh pa hoik tiem tix ka daux phuk lai Yasha ang mawh lie? Mawh kheu nan, singaix cung ti kaog ka daux sigreung raoma mai ang niied ti hu klip been tix ngaix heue. <sup>14</sup> Daux singaix pa awm an ang lai koe pie tix ngaix kawx, sivo in mai khaix in sax, ka pa hoik nghiet Simiang Siyiex ka lox pui tix kaux, kheu Simiang Siyiex hoik puing naing ka son ceu pui Isarela khankix heue. <sup>15</sup> Khaix an, Yawsux deeh ing tau mai ceu pui Isarela khankix ka dee bang kix tix daux Gilagalax heue.

### ***Grawng Pah Ka Simiang Amawrix***

<sup>16</sup> Simiang inkix phuan kaux hoik to mai mox tix ka daux rang ka dee Makeda. <sup>17</sup> An hoik mawh pa kraik kix ka Yawsux ah nin, “Hoik yaoh ka simiang phuan kaux ka dee mox kix tix ka daux rang Makeda heue.” <sup>18</sup> Mawh kheu nan, Yawsux deeh ah nin, “Pluplieh ka simaox pa ting mai thox daux moing rang an mai kieh pui pau ka dee an, <sup>19</sup> tokaux pex kawx paw lai ot tan, niied ti hawt pheet ka pui koeng pex khankix mai puing kix dee krup pex ka kix, paw kieh kix pon laig daux veng khankix, kheu Simiang Siyiex pex hoik ap ti tawx kix ka daux tawm taix pex heue.” <sup>20</sup> Glang yuh Yawsux mai pui Isarela khankix krax pa ghoik ti pah kix yum ka daux pa kied ting, tom hoek bawgyam pa hoik yuh kix ceu an khankix, can pui pa deuk khankix pon ti laig ka daux veng pa kauxcong khankix, <sup>21</sup> pui khankix khawmuik deeh ing ka dee bang tix mai hoek ka Yawsux hawt Makeda tau mai krax pa otyiienyawg mai pui tix kaux kawx tak ang kieh dak tix ah lox deuh phimap ka ceu pui Isarela khankix heue. <sup>22</sup> Khaix an, Yawsux deeh ah nin, “Paoh daux moing rang maiteei simiang ankix phuan kaux hoek ka aux.” <sup>23</sup> Kix hawt ti yuh awm pa ah nawh mai kix viex simiang ankix phuan kaux hoek ka nawh pa mawh simiang veng Yerusalie, simiang veng Hebron, simiang veng Yamok, simiang veng Lakhishax mai simiang veng Egalon khankix heue. <sup>24</sup> Yam hoik viex kix simiang ankix hoek ka Yawsux mai

Yawsux kok ceu pui Isarelax khawmuik ah nin ka cao kaing naing khankix pa hoik hu tau mai nawh, “Hoek dee dex mai deuh caong pex ka piang singawg simiang inkix.” Khaix an, kix hoek dex mai deuh caong tix ka piang singawg pui ankix.<sup>25</sup> Khaix an, Yawsux ah nin ka kix, “Paw lhatgraung mai paw lauxrhawm, teei riang rao tix mai kieh koe krax kuarhawm ka daux ceu pa mhawm heue. Grawh grawng nawh, Simiang Siyiex tak yuh ceu ankix ka pui koeng pex khankix pa sang puing pex kah heue.”<sup>26</sup> Khaix hoik ceu ankix, Yawsux pah kix ka vaid mai takteue kix piang khaox phuan gawng tom hoek plak bo heue.<sup>27</sup> Viang mawh nan, yam dex sang klip singaix, Yawsux tawm lox ka kix mai kieh kix teei kix lih khaing piang khaox mai tik kix ka daux rang dee hoik mox kix tix kah, kix pum ti deuh simaox pa ting khankix ka daux moing rang mai an mawh pa kawm koe tom in singaix heue.

***Grawng Pex Kix Haktiex Plak Jee***

<sup>28</sup>Ka daux singaix an, Yawsux puing ti teei veng Makeda mai pah ti tik simiang veng an ka lawm vaid, nawh yuh pui pakoe ka daux veng an lauxlak pakleeing khawmuik, nawh ang lai prah pui klawd tix kaux kawx, nawh yuh ka simiang veng Makeda awm pa hoikyuh nawh ka simiang veng Yerikho heue.<sup>29</sup> Khaix an, Yawsux deeh lih hu khaing veng Makeda tau mai ceu pui Isarelax khankix mai hu ka plak veng Libanax, kix puing veng Libanax mai<sup>30</sup> Simiang Siyiex baox deeh ap tix tawx veng an mai khawm simiang nawh ka daux tawm taix ceu pui Isarelax mai nawh mug ti tik pui pa ot ka daux veng an khankix ka lawm vaid tix, nawh ang lai prah pui klawd tix kaux kawx ka daux veng an mai nawh yuh ka simiang veng an awm hoik yuh nawh ka simiang veng Yerikho heue.<sup>31</sup> Khaix an, Yawsux deeh lih khaing veng Libanax tau mai pui Isarelax khankix hu ka veng Lakhishax mai puing ka veng an,<sup>32</sup> Simiang Siyiex hoik ap ti tawx veng Lakhishax ka daux tawm taix ceu pui Isarelax khankix heue. Kix puing ti teei veng an ka daux ra ngaix tix ngaix mai kix mug ka pui khankix pa ot ka daux veng ka lawm vaid awm pa hoikyuh

kix ka veng Libanax heue.<sup>33</sup> Khaix an, simiang Hawram, khaing veng Geza hoek ti teem ka veng Lakhishax mai Yawsux mug ti tik nawh mai khawm pui nawh khankix tom ang nawh lai prah kix pie tix kaux kawx heue.<sup>34</sup> Yawsux kaoh khaing veng Lakheshax, deeh lih hu ka veng Egalon tau mai ceu pui Isarelax khankix khawmuik mai kix puing ka veng an ka daux singaix<sup>35</sup> mai mug ka pui pa koe ka daux veng an khawmuikka lawm vaid mai nawh yuh kix lauxlak pakleeing ka daux singaix an awm pa hoik yuh nawh ka veng Lakheshax.<sup>36</sup> Khaix an, Yawsux deeh lih khaing veng Egalon tau mai ceu pui Isarelax khankix mai hu ka veng Hebron mai puing ka veng an heue.<sup>37</sup> Kix puing ti teei veng an mai mug ka simiang khawm pa dexdawd mai nawh khankix mai can pui pa ot daux veng an ka lawm vaid mai nawh ang lai prah kix pie tix kaux kawx mai nawh yuh kix lauxlak pakleeing ka daux singaix an awm pa hoik yuh nawh ka veng pa hoik yuh nawh ka veng Egalon mai pui veng Egalon.<sup>38</sup> Khaix an, Yawsux deeh ing tau mai ceu pui Isarelax khankix khawmuik ka veng Debirax mai kix puing veng an heue.<sup>39</sup> Kix teei veng an tau mai simiang kix mai khawm veng khankix mai kix mug kix ka lawm vaid mai yuh pui can pa ot ka daux veng khankix lauxlak pakleeing mai ang lai prah kix pie tix kaux kawx, awm hoik yuh ka veng Hebron mai veng Libanax mai tak yuh ka veng Debirax khawm simiang kix heue.<sup>40</sup> Mawh kheu nan, Yawsux pex ka haktiex khawmuik pa mawh haktiex gawng lua mai pa koe plak jee mai dee lung hawt caong gawng khankix mai ka simiang kix khawmuik heue. Nawh ang lai prah klawd pie tix kaux kawx mai nawh yuh can pa im ju khankix lauxlak pakleeing awm gumlox pa hoik tawm Simiang Siyiex pui Isarelax heue.<sup>41</sup> Yawsux pex ka kix, jah khaing veng Kadeshabana, tom hoek ka hatiex baoh veng Gaza, Goshin mai baoh pa koe ka dee singai ka veng Gibon heue.<sup>42</sup> Yawsux hoik pon teei haktiex mai simiang kix tidom neh, mawh kheu Simiang Siyiex ceu pui Isarelax hoik puing naing son pui Isarelax khankix heue.

<sup>43</sup> Khaix an, Yawsux deeh blak ti ing tau mai pui Isarelaix khankix khawmuik ka dee bang peung kix daux Gilagalax heue.

### **11 Pex Ka Haktiex Plak Blaong**

Yam hoik mhong Yabin pa mawh simiang veng Hazaw ka ceu inkix, nawh ploi pui hu ka Yawbat pa mawh simiang veng Madon, ka simiang veng Shimaron, ka simiang veng Akhashap khankix <sup>2</sup> pa mawh simiang pa ot plak blaong ka paing gawng lua khankix mai ka daux lung pa koe ka plak jee veng Gennesariet mai ka piang dee lung haktiex khankix mai ka dee lhaong tiex plak haktiex Dawrax khankix, pa koe ka plak klip khankix <sup>3</sup> mai ka pui Khanan pa ot ka plak toh mai ka plak klip, pui Amawrix, pui Hittix, pui Pherazix, pui Yebusix, pa ot ka piang gawng lua khankix mai pui Hiwix, pa ot greem caong gawng Heramon ka daux haktiex Misapa heue. <sup>4</sup> Mawh kheu nan, kix lih hu tau mai krunaing pa koe kix, krunaing kix mawh krunaing ting awm mhaik praok rawm sigrit sigra taumai brung naing khawm linglawx brung naing kix pa kied hun khawmuik heue. <sup>5</sup> Cub simiang inkix khrawm krunaing tau mai bang ti ot hawt rawm nhawng Merom sonsang puing ka pui Isarelaix khankix heue. <sup>6</sup> Simiang Siyiex ah nin ka Yawsux, "Paw lhatgraung ka kix, Aux tak ap ti tawx kix yum ka plak sivoce ceu pui Isarelaix khankix ka daux yam in pasax heue. Pex tak pat ti tik siniag caong brung kix mai gleeing ti tik linglawx brung kix khawmuik ka ngu." <sup>7</sup> Mawh kheu nan, Yawsux mai pui naing nawh khawmuik lih hu sijaoux mai rieb ti puing kix hawt rawm nhawng Merom heue. <sup>8</sup> Simiang Siyiex hoik ap ti tawx kix ka daux tawm taix pui Isarelaix mai hoik pex kix mai hawt ti pheet tom hoek ka veng ting Sidom mai hoek ka rawm klawng Misarephotamen mai ka ngawd Mizapa pa koe ka plak toh heue. Kix pah ti tik kix tom ang lai prah kix klawd pie tix kaux kawx heue. <sup>9</sup> Yawsux yuh ceu an ka kix awm pa hoik krai Simiang Siyiex ka nawh, nawh pat ti tik siniag caong brung kix mai gleeing ti tik linglawx brung kix ka ngu heue. <sup>10</sup> Yawsux deeh blak ti ing bawgyam an mai puing ti teei veng Hazaw mai pah

11:20 Pi 7:16.

simiang nawh ka lawm vaid, mawh kheu veng Hazaw hoik dawg mawh dee kuang simiang ka haktiex khankix heue. <sup>11</sup> Kix mug pui pa koe daux veng an yum ka lawm vaid lauxlak pakleeing, can pui pa im ju ang lai koe pie tix kaux kawx, khaix an, nawh gleeing ti tik veng Hazaw ka ngu heue. <sup>12</sup> Awm lox pa hoik tawm Mose pa mawh kawncau Siyiex, Yawsux puing ti teei veng pa kuang simiang ankix khawmuik mai mug simiang khankix khawmuik yum ka lawm vaid mai yuh kix lauxleeing heue. <sup>13</sup> Viang mawh nan, Yawsux mai pui Isarelaix khankix ang lai gleeing ka can veng pa koe ka piang gawng lua khankix pie tix veng kawx, lheu khaing veng Hazaw heue. <sup>14</sup> Kraung pa pontudrhim kix khaing daux veng inkix khawm tobrie eei kix pui Isarilax khankix teei ti cie awm kraung pa pon tudrhim kix son tokaux kix heue. Viang mawh nan, kix pah pui kukaux ka lawm vaid tom hoek bawgyam hoik lauxleeing kix mai kix ang lai prah pui im pie tix kaux kawx heue. <sup>15</sup> Awm hoik tawm Simiang Siyiex gumlox Tix ka kawncau Nawh Mose, mawh kheu nan Mose deeh tawm lox ka Yawsux mai Yawsux hawt ti yuh awm an heue. Awm pa hoik tawm Simiang Siyiex ka Mose nawh ang prah canceu pa ang nawh nyang hoik yuh tix ceu kawx heue.

### **Yawsux Pex Ka Haktiex An Khankix**

<sup>16</sup> Mawh kheu nan, Yawsux hoik rhim ti teei haktiex inkix khawmuik, pa mawh haktiex gawng lua pa koe plak jee mai haktiex Goshin khawmuik daux lung daux ngawd mai daux lung rawm klawng Yawdan, khawm gawng Isarelaix khankix tau mai daux lung daux ngawd nawh khankix, <sup>17</sup> jah khaing gawng Halat mai krax pa lih dung ka gawng Sirax, tom hoek dee singai ka veng Balagat pa koe daux ngawd Lebanon ka plak greem caong gawng Heramon heue. Nawh hoik giex simiang kix khawmuik mai pah kix yum ka lawm vaid heue. <sup>18</sup> Yawsux yuh naing ka simiang inkix khawmuik tom rheeng bawgyam heue. <sup>19</sup> Lheu khaing pui Hiwix mai pui pa ot ka daux veng Gibon khankix, veng tix veng kawx ang yuh krax nhim tau mai pui Isarelaix khankix heue.

Veng tangdah khankix khawmuik hoik mawh pa rhim ti teei khaing dauh bang naing heue. <sup>20</sup> Grawh grawng nawh, Simiang Siyiex hoik yuh rhawm kix kiien sonsang puing ka pui Isarelaux khankix mai sonsang yuh Nawh Cao kix lauxleeing mai kix tak ang lai mawh pa sang pon krax cauxrhawm, mawh kheu nan, Nawh Cao tak sang yuh kix lauxlak pakleeing awm gumlox pa hoik tawm Simiang Siyiex ka Mose heue. <sup>21</sup> Ka dauh bawgyam an, Yawsux deeh hoek mai grheu ti tik ceupui Anagax khankix khaing gawng, khaing veng Hebron, khaing veng Debirax, khaing veng Anabax, khaing gawng Yudax mai khaing gawng Isarelaux khawmuik mai Yawsux yuh kix lauxleeing tau mai veng pa ot kix khawmuik heue. <sup>22</sup> Can pui Anagax ang lai deuk tix kaux kawx ka dauh haktiex pui Isarelaux khankix, kix kawm ot ngie ka dauh veng Gaza, veng Gata mai ka dauh veng Ashadot nongnong heue. <sup>23</sup> Mawh kheu nan, Yawsux rhim ti teei haktiex hawt baoh an khankix khawmuik, awm pa hoik tawm Simiang Siyiex ka Mose mai Yawsux hoik tawx ankix mawh sinngao ka pui Isarelaux khankix, awm goih kix ti koe cub mawx cub an ka doehru kix, khaix an, haktiex hoik yiien hu khaing naing heue.

## **12 Simiang Pa Hoik Pex Mose**

Inkix mawh simiang haktiex pa hoik pex ceu pui Isarelaux khankix mai haktiex pa hoik pon kix ti cie ka plak toi rawm klawng Yawdan ka plak dee lih singaix jah khaing rawm klawng Anon, tom hoek ka gawng Heramon mai dauh lung rawm klawng Yawdan pa koe ka plak toh. <sup>2</sup> Simiang Sihon pa mawh simiang ceu pui Amawrix pa ot ka dauh veng Heshabon mai pa kuang ka piang haktiex Gilat tix plak, khawm veng Araw tix plak, pa koe ka praok rawm klawng Anon, tom hoek dee singai ka rawm klawng Yabok pa koe hawt mee haktiex ceu pui Amon khankix. <sup>3</sup> Mai dauh lung dauh ngawd rawm klawng Yawdan pa koe ka plak toh khaing rawm sigrit sigra Gennisariet, tom hoek dee singai ka rawm 12:1-5 Si 21:21-35, Pi 2:26, 3:11. 12:6 Si 32:33, Pi 3:12.

sigrit sigra Arabax, rawm sigritsigra kih mai dauh krax hu kix ka plak veng Bietyeshimut mai ka plak jee pa koe ka greem caong gawng Pisaga. <sup>4</sup> Simiang Awgax haktiex Bashan, pa kuang ka mee haktiex pa kawm deuk khaing pui pa ting lhaong ankix, pa kuang ka veng Ashatarot mai veng Edarix <sup>5</sup> mai pa kuang ka gawng Heramon, haktiex Salakha mai ka piang haktiex Bashan khankix khawmuik, tom hoek dee singai ka hawt mee haktiex ot ceu pui Geshurix mai ceu pui Makha mai haktiex Gilat tix plak, tom hoek dee singai ka hawt mee haktiex simiang Sihon, pa ot haktiex Heshabon heue. <sup>6</sup> Inkix mawh pa hoik pex Mose pa mawh kawncau Simiang Siyiex tau mai pui Isarelaux khankix heue. Mose pa mawh kawncau Simiang Siyiex hoik tawx ankix ka ceucad Rubin, ka ceucad Gat mai ka doehru Manashe tix plak awm pa sang pon kix ti cie heue.

### ***Yawsux Pex Ka Simiang Khankix***

<sup>7</sup> Inkix mawh simiang haktiex pa hoik pex Yawsux mai pui Isarelaux kah, ka plak klip rawm klawng Yawdan, jah khaing veng Balagat dauh ngawd Lebanon, tom hoek ka gawng Baliyet mai krax hu plak see Sirax, Yawsux tawx ankix ka Isarelaux, awm pa koe doehru kix, pa mawh <sup>8</sup> haktiex piang gawng lua, haktiex dee tiem, dauh lung ka plak see praok rawm klawng Yawdan, ka dauh tiag khankix mai ka plak jee pa mawh dee ot pui Hitix, pui Amawrix, pui Khananix, pui Pherazix, pui Hiwix mai pui Yebusix khankix heue. <sup>9</sup> Simiang pa pex Yawsux khankix mawh simiang veng Yerikho tix kaux, simiang veng Ai tix kaux, pa ot hawt praok veng Betelax tix kaux, <sup>10</sup> simiang veng Yerusaliem tix kaux, simiang Hebron tix kaux, <sup>11</sup> simiang veng Yamot tix kaux mai simiang veng Lakhishax tix kaux, <sup>12</sup> simiang veng Egalon tix kaux mai simiang veng Geza tix kaux, <sup>13</sup> simiang veng Debirax tix kaux mai, simiang veng Geda tix kaux, <sup>14</sup> simiang veng Hawma tix kaux mai simiang veng Arat tix kaux, <sup>15</sup> simiang veng Libanax tix kaux mai simiang veng Adulam tix kaux, <sup>16</sup> simiang veng Mageda tix kaux mai simiang veng Betelax tix kaux, <sup>17</sup> simiang veng Tapua tix kaux mai simiang veng Hepha

tix kaux, <sup>18</sup>simiang veng Aphiet tix kaux mai simiang veng Lasharon tix kaux, <sup>19</sup>simiang veng Madon tix kaux mai simiang veng Hazaw tix kaux, <sup>20</sup>simiang veng Shimaron-meron tix kaux mai simiang veng Akhashap tix kaux, <sup>21</sup>simiang veng Tanax tix kaux mai simiang veng Megidaw tix kaux, <sup>22</sup>simiang veng Kedeshax tix kaux mai simiang veng Yokanam pa ot piang gawng Kharamelax tix kaux, <sup>23</sup>simiang veng Dawrax pa ot ka dee lhaong gawng Dawrax tix kaux mai, simiang pui haktiex Gilagalax, pa mawh Gaw-eng tix kaux, <sup>24</sup>simiang veng Tiraza tix kaux, simiang khawmuik koe tixgoe tix kaux heue.

**13** *Haktiex Pa kawn Deuk*  
 Yam in Yawsux hoik riex ju sipie mai hoik kuad heue. Simiang Siyiex ah nin ka nawh, “Maix hoik riex ju sipie mai hoik kuad, haktiex pa sang baox rhim pex ti teei kawn koe tomnie heue. <sup>2</sup>In mawh haktiex pa kawn deuk pa mawh haktiex kuang pui Philitix mai haktiex kuang pui Geshurix khankix, <sup>3</sup>jah ka rawm klawng Shihawrax pa koe ka plak toh meung Ejiptux, tom hoek ka mee haktiex veng Ekaron pa koe ka krax plak blaong, pa mawh dee ot ceu pui Khananix khankix, haktiex pa kuang simiang Philitix phuan kaux pa mawh pui Gaza, pui Ashadawdix, pui Ashakelonix, pui Gitix mai pui Ekarawnix, khawm pui Ewix khankix, <sup>4</sup>jah khaing plak jee pa mawh haktiex pui Khananix mai haktiex Mara pa mawh cie pui Sidom, tom hoek ka veng Aphiet ka mee haktiex pui Amawrix, <sup>5</sup>haktiex pui Gebalix mai haktiex Lebanon khankix khawmuik pa koe plak toh, jah khaing veng Balagat pa koe greem caong gawng Heramon, tom hoek ka krax laig kix haktiex Hamat, <sup>6</sup>can pui pa ot piang gawng lua haktiex Lebanon, tom hoek ka rawm klawng Misarephot mai dee ot pui Sidom khankix, Aux tak grheu ti tik kix ka plak sivoe pui Isarelast khankix mai goih tix tawx ankix ka niep son sinngao pa sang pon ceu pui Isarelast awm pa hoik tawm Aux ka maix heue. <sup>7</sup>Mawh kheu nan, yam in goih tix tawx haktiex in mawh sinngao son doehru kix sidim cub mai ka doehru Manashe tix plak heue.”

13:6 Si 33:54. 13:8 Si 32:33, Pi 3:12. 13:14 Pi 18:1.

### *Grawng Pa Goih Haktiex*

<sup>8</sup>Cub doehru Manashe pa deuk tix plak, pui Rubin mai pui Gat khankix tak pon ti cie sinngao pa hoik tawx Mose ka kix ka plak toi rawm klawng Yawdan ka plak toh, awm pa hoik tawx Mose pa mawh kawncaw Simiang Siyiex ka kix, <sup>9</sup>jah khaing veng Araw pa koe praok rawm klawng Anon mai veng pa koe daux sinax dee kaw klaw rawm mai ka daux lung Medebax khawmuik tom hoek ka veng Dibon <sup>10</sup>mai veng simiang Sihon pa mawh ceu pui Amawrix pa kuang ka veng Heshabon, tom hoek ka mee haktiex Amon, <sup>11</sup>ka haktiex Gilat mai ka mee haktiex pui Geshurix mai haktiex pui Makhatix, khawm gawng Heramon mai haktiex Bashan khawmuik, tom hoek ka haktiex Salakha <sup>12</sup>mai ka haktiex simiang Awgax pa ot daux haktiex Bashan khawmuik, pa kuang ka veng Ashatarot mai veng Edarix, pa mawh pui deuk khaing pui pa ting lhaong khankix heue. Grawh grawng nawh, Mose hoik pex ka kix mai hoik grheu ti tik simiang ankix khaing tan heue. <sup>13</sup>Viang mawh nan, pui Isarelast khankix, ang lai grheu ti tik pui Geshurix mai pui Makhatix khankix, mawh kheu pui Geshurix mai pui Makatix khankix ot sinax pui Isarelast khankix tom hoek in singaix heue. <sup>14</sup>Mawh ngie doehru pui Lewix pa ang nawh tawx kix cie sinngao heue. Krax pa appong pui Isarelast khankix kuceu ka Siyiex pa mawh krax tan pa gleeng khankix, tak mawh sinngao cie kix awm hoik tawm Nawh Cao ka kix heue.

### *Haktiex Cie Cub Rubin*

<sup>15</sup>Mose hoik tawx sinngao ka doehru kawn praix Rubin awm koe paox nyiex kix nyiexma mawx nyiexma an heue. <sup>16</sup>Mee haktiex cie kix, jah tix khaing veng Araw pa koe praok rawm klawng Anon mai veng pa koe sinax dee kaw klaw rawm klawng mai daux lung khankix pa koe hawt veng Medebax khawmuik, <sup>17</sup>veng Heshabon mai veng pa koe daux lung khawmuik, veng Dibon, veng Bamotbalax, veng Bietbalamon, <sup>18</sup>veng Yahaza, veng Gedamot, veng Mephat, <sup>19</sup>veng Girayatim, veng Sibama, veng Zerietshaha pa koe sinax ngawd piang gawng khankix, <sup>20</sup>veng Bietpegurax mai haktiex caong gawng Bizaga mai veng Bietyeshimot

<sup>21</sup> mai can veng khankix pa koe ka daux lung khawmuik mai haktiex simiang Sihon pa mawh ceu pui Amawrix, pa kuang ka veng Heshabon heue. Mose hoik kieh simiang Midian phuan kaux pa mawh simiang Ewix, simiang Rekim, simiang Zurax, simiang Hurax mai simiang Riba khankix hu puing ti teei haktiex dee ot simiang Sihon heue. <sup>22</sup> Pui Isarelax khankix baox pah cao jhai Balam pa mawh kawn simex Bawrax, ka lawm vaid daux sinax pui pa hoik pah kix yum khankix heue. <sup>23</sup> Mee haktiex pui Rubin khankix mawh pa koe praok rawm klawng Yawdan heue. In mawh sinngao cie pui Rubin, awm pa koe pao nyiex kix, khawm veng khawm yaong cie kix khawmuik heue.

#### ***Haktiex Cie Cub Gat Khankix***

<sup>24</sup> Mose baox tawx sinngao ka doehru ceucad Gat awm diag pa koe paox nyiex kix heue. <sup>25</sup> Mee haktiex pa kuang kix tak mawh veng Yaza mai veng pa koe hawt veng Gilat khawmuik mai haktiex cie ceu pui Amon tix plak, tom hoek ka veng Araw pa koe ka plak toh veng Raba, <sup>26</sup> jah khaing veng Heshabon, tom hoek ka veng Ramatmizapa mai veng Betawnim khankix mai deeh jah tix khaing veng Mahanem, tom hoek ka mee haktiex veng Debirax <sup>27</sup> mai ka daux ngawd veng Biet Haram, veng Biet Nimarax, veng Sugut mai veng Zaphon mai haktiex pa ghoik ti mawh cie Sihon simiang veng Heshabon heue. Rawm klawng Yawdan mawh mee haktiex cie kix mai hoek tom praok rawm sigrít sigrá Genesariet pa koe toi rawm klawng Yawdan plak toh heue. <sup>28</sup> In mawh sinngao cie kawn praix ceu pui Gat khankix awm diag pa koe paox nyiex kix, khawm veng khawm yaong kix khawmuik heue.

#### ***Haktiex Ru Manashe***

<sup>29</sup> Mose baox deeh tawx sinngao ka doehru Manashe tix plak, awm diag pa koe paox nyiex kix heue. <sup>30</sup> Mee haktiex pa kuang kix, jah khaing veng Mahanem khawm haktiex Bashan khawmuik mai haktiex simiang Awgax, ka haktiex Bashan khawmuik mai pa koe hawt veng Ya-irax 13:33 Si 18:20, Pi 18:2. 14:2 Si 26:52-56, 34:13. 14:3 Si 32:33, 34:14-15, Pi 3:12-17.

khankix tixgliah veng pa koe ka daux haktiex Bashan khawmuik, <sup>31</sup> haktiex Gilat tix plak mai veng Ashadarot mai veng Edarix, khawm veng pa koe ka daux haktiex simiang Awgax, ka haktiex Bashan khawmuik hoik mawh son cie kawn praix Makhirax pa mawh kawn simex Manashe mai son cie kawn praix Makhirax khankix tix plak, awm diag pa koe paox nyiex kix heue. <sup>32</sup> In mawh haktiex pa hoik goih Mose ti tawx sinngao ka kix daux lung Mawbax pa koe ka plak toi rawm klawng Yawdan, ka plak toh veng Yerikho heue. <sup>33</sup> Viang mawh nan, son doehru pui Lewix khankix, Mose ang lai tawx sinngao cie kix pie tix ceu kawx, grawh grawng nawh, Simiang Siyiex ceu pui Isarelax hoik mawh sinngao cie kix, awm pa hoik krai Nawh Cao ti deuh ka kix heue.

**14** ***Goih Haktiex***  
Inkix mawh haktiex pa hoik pon pui Isarelax khankix ti cie, pa mawh sinngao kix ka daux haktiex meung Khanan mai pa hoik goih cao giex kaing li Eliaza mai Yawsux pa mawh kawn simex Nun mai caokaing keeing doehru Isarelax khankix ti tawx ka kix heue. <sup>2</sup> Sinngao cie kix hoik mawh pa goih tix ka niep mai gumlox pa hoik tawm Simiang Siyiex ka daux tawm taix Mose, son doehru kix sidim cub mai tix plak heue. <sup>3</sup> Mose hoik tawx sinngao ka doehru pui Isarelax khankix ra cub mai tix plak sonsang pon kix ti cie haktiex pa koe toi rawm klawng Yawdan heue. Viang mawh nan, son ceu pui Lewix khankix, nawh ang nyang bax tawx sinngao tix ceu kawx ka kix, <sup>4</sup> mawh kheu jao koe doehru kawn praix Yosiep khankix ra cub pa mawh Manashe mai Epharen khankix heue. Kix ang lai tawx dahdee tix dah kawx ka pui Lewix khankix ka daux haktiex an, lheu khaing veng pa sang ot kix tau ka haktiex cie pui hun mai son tobrie pa eei kix, sonsang deuh kix kraung khrai cie tix nongnong heue. <sup>5</sup> Awm gumlox pa hoik tawm Simiang Siyiex ka Mose, pui Isarelax khankix hawt ti yuh mai kix hoik goih haktiex an ka daux sinax kix heue.

### ***Kaliep Pon Sinngao Veng Hebron***

<sup>6</sup> Khaix an, pui Yudax khankix hoek ka Yawsux ka daux Gilagalax, Kaliep pa mawh kawn simex Yephunie mai pa mawh ceu pui Keniet ah nin ka nawh, “Maix hoik tawng ka gumlox pa hoik krai Simiang Siyiex ka Mose pa mawh pui Siyiex, son grawng maix khawm aux, ka daux haktiex Kadeshax heue. <sup>7</sup> Aux hoik koe jutixon num yam hoik ploi Mose pa mawh kawncau Simiang Siyiex aux lih hu khaing baoh haktiex Kadeshabana sonsang jiang aux ti yaox ka haktiex ankix mai aux hoik deeh viex lox satang hoek ka nawh, awm pa hoik koe daux rhawm aux heue. <sup>8</sup> Viang puxaik aux khankix pa hoik hu tau mai aux hoik yuh krax khruhrawm pui khankix kawx, aux mawh pa hawt grawng lawng khaix Simiang Siyiex tix khawmuik heue.” <sup>9</sup> Mawh kheu nan, Mose koe lox pa tiextu ka daux singaix an mai hoik ah nin, “Haktiex dee pa hoik dig maix khankix tak mawh sinngao cie maix mai cie kawn praix maix khankix leeingju heue. Grawh grawng nawh maix hoik mawh pa hawt grawng lawng khaix Simiang Siyiex aux khawmuik heue. <sup>10</sup> Yam in, jhak heue, Simiang Siyiex hoik kieh aux im ju tixon phuan num awm pa hoik krai Nawh Cao ka Mose glang ka singaix yam kawn vung viang ceu pui Isarelaux khankix ka daux tiag, yam in, aux hoik koe ju tixdaix phuan num heue. <sup>11</sup> Aux kawn koe riang rao ka daux in singaix, awm yam ploi Mose aux hu heue. Awm pa hoik koe riang rao aux yam an, riang rao aux kawn koe tom yam in sonsang puing naing, khawm son krax pa lih hu mai son krax pa deeh laig heue. <sup>12</sup> Mawh kheu nan, yam in tawx gawng lua in pa hoik krai Simiang Siyiex ka daux singaix an ka aux heue. Grawh grawng nawh maix hoik mhong ka pa hoik koe ceu pui Anagax khankix tan mai veng cie kix hoik mawh pa ting lhaong mai pa kauxcong khawmuik yuh ka mawx heue. Phan Simiang Siyiex ot tau mai aux ceu ankix takponti mawh mai aux tak mawh pa pon ti grheu kix lih awm pa hoik krai Simiang Siyiex heue.” <sup>13</sup> Yawsux nawb buan ka piangnawh mai tawx haktiex

14:6 Si 14:30. 14:7 Si 13:1-30. 14:9 Si 14:24.

Hebron ka Kaliep pa mawh kawn simex Yephunie mawh sinngao pa pon nawh ti cie heue. <sup>14</sup> Mawh kheu nan, haktiex Hebron hoik mawh sinngao cie Kaliep pa mawh kawn simex Yephunie mai pa mawh ceu pui Keniet khankix, tom hoek ka daux in singaix, kheu jao hoik hawt nawh khaix Simiang Siyiex ceu pui Isarelaux heue. <sup>15</sup> Glang ka an, ceukaux veng Hebron hoik mawh Kirayat Arabax heue. Grawh grawng nawh, Arabax hoik mawh pui pa kied ting ka daux sinax ceu pui Anagax khankix heue. Khaix an, haktiex an khankix khawmuik hoik mawh pa yienyawg khaingnaing heue.

### **15 *Haktiex Ceucad Yudax***

In mawh niep pa cawx ceucad Yudax khankix ti pon awm diag pa koe paox nyiex kix pa mawh mee haktiex Edom, hawt daux tiag Sin, ka sinax plak jee khankix hoik mawh mee kix heue. <sup>2</sup> Mee haktiex plak jee mawh pa jah tix ka rawm sigrit sigra kih, khaing dee kaww rawm pa koe plak jee khankix heue. <sup>3</sup> Mee haktiex kix, deeh lih hu ka praok plak jee, hawt dee lih jee haktiex Akarabim mai mee an deeh hu hawt baoh yaong Sin mai deeh hu jee ka praok plak jee Kadeshabana mai mee deeh hu hawt yaong Hezaron mai deeh haok ka plak yaong Ada mai an deeh hu hawt vungviang yaong Karaka heue. <sup>4</sup> Jah khaing tan, mee haktiex deeh hu ka plak yaong Azamon mai deeh lih hu ka hawt rawm klawng Ejiptux mai mee haktiex an ghoik ti sidah ka praok rawm sigrit sigra heue. In tak mawh mee haktiex pexka plak jee heue. <sup>5</sup> Mee haktiex plak toh mawh pa jah tix khaing rawm sigrit sigra kih, Nhawng Sawdom tom hoek dee sidah toh rawm klawng Yawdan heue. Mee haktiex pa koe plak blaong mawh pa jah tix khaing hawt dee kaww rawm sigrit sigra dee sidah toh rawm klawng Yawdan heue. <sup>6</sup> Mee haktiex deeh haok ka plak yaong Biethawgalax mai hu ka plak blaong yaong Bietarabax tan heue. Khaix an, mee haktiex deeh haok ka plak dee koe rang cie Bawhan pa mawh kawn simex Rubin heue. <sup>7</sup> Khaix an, mee haktiex deeh haok plak yaong Debirax khaingngawd Akhaw mai mee haktiex an deeh veeh ti hu ka baoh plak blaong ka plak

see veng Gilagalax, pa koe ka plak sivoe caong gawng Adumin mai pa koe ka praok plak jee daux ngawd heue. Mee haktiex deeh baoux hu ka plak rawm nhawng Engshamit mai ghoik tix sidah ka yaong Engrawgelax heue.<sup>8</sup> Mee haktiex deeh haok hawt plak ngawd kawn simex Himnom mai deeh lih hu ka plak jee hawt caong veng Yebusix, Yebusix mawh veng Yerusalem yam in heue. Mee haktiex deeh haok ka plak choek gawng khankix pa koe ka plak sivoe ngawd Himnom, ka plak klip pa koe hawt dee sidah gawng Rephim ka plak blaong heue.<sup>9</sup> Khaix an, mee haktiex deeh lih hukhaing hawt vungviang dee choek gawng an khankix mai hoek ka dee lih rawm gawng Nephataw mai plak lang tom hoek ka veng pa koe hawt gawng Epharon khankix heue. Mee haktiex an, deeh hu hawt vungviang veng Balax, veng Balax mawh veng Kiratyrim heue.<sup>10</sup> Khaix an, mee haktiex deeh veeh ti hu ka plak klip khaing veng Balax, tom hoek ka gawng Sirax mai mee an deeh hu ka praok gawng Yarim pa koe ka plak blaong pa mawh gawng Khesalon mai deeh hu jee ka veng Bietshehit mai mee an deeh hu plak veng Timanax heue.<sup>11</sup> Mee haktiex an deeh lih hu ka plak praok veng Ekaron hawt plak blaong piang gawng heue. Khaix an, mee haktiex deeh hu hawt vungviang yaong Shikaron mai hu hawt ka gawng Balax mai lang tom hoek ka yaong Yabanelax mai mee haktiex an deeh hu sidah hawt rawm sigrit sigra heue.<sup>12</sup> Mee haktiex plak klip mawh pa koe hawt praok rawm sigrit sigra ting heue. In mawh mee haktiex pui Yudax khankix khawmuik awm pa koe doehru nyiexma kix heue.

### ***Kaliep Teei Hebron Mai Debirax***

*(Cao 1:10-15)*

<sup>13</sup> Awm gumlox pingnyap pa hoik tawm Simiang Siyiex ka Yawsux, nawh tawx Kaliep pa mawh kawn simex Yephunie cie nyum pa pon nawh khaing daux sinax pui Yudax khankix heue. Ceukaux veng pa tawx nawh khankix mawh veng Arabax, mai Hebaro, Arabax mawh ceukaux keeing Anagax heue.<sup>14</sup> Kaliep grheu ti tik kawn simex

Anagax khankix loe kaux pa mawh Shesie, Ahiman mai Talamie khaing tan, kix mawh kawn praix Anagax heue.<sup>15</sup> Khaix an, nawh yaog ti hu khaing tan mai hoek ka dee ot pui veng Debirax heue. Glang ka an, ceukaux veng Debirax mawh veng Kirayatsepha heue.<sup>16</sup> Kaliep deeh ah nin, "Pui mawx pa pon puing mai pon rhim ti teei ka veng Kirayatsepha, aux tak tawx nawh moeng kawn sibun tix Akhasax heue.<sup>17</sup> Mawh kheu nan, Awtanelax pa mawh kawn simex Kenat pux Kaliep rhim ti teei nawh cie veng an heue. Nawh tawx nawh moeng kawn sibun tix Akhasax heue.<sup>18</sup> Yam in, khaix hoik luan ceu an khankix yam hoek sibun an ka nawh, sibun an nyawglaw nawh mhaing biang kaung tix guang ka keeing tix heue. Mawh kheu nan, yam lih sibun an khaing law brug tix, yam an Kaliep ah nin ka nawh, "Mawh koe rhawm maix ti sang cie ceu patix lie?"<sup>19</sup> Nawh deeh ah nin, "Tawx krax pa nawb buan ka aux, awm hoik tawx maix haktiex pa koe plak jee maix deeh baoux tawx aux cie haktiex dee lih rawm liak." Mawh kheu nan, Kaliep tom tawx haktiex dee lih rawm ka plak laong khawm haktiex dee lih rawm plak seh dee lung ka nawh heue.

### ***Grawng Veng Ceucad Yudax***

<sup>20</sup> Inkix mawh sinngao cie doehru pui Yudax khankix awm pa koe doeh nyiexma kix heue.<sup>21</sup> Veng pa hoik tat ti deuh son doehru pui Yudax khankix mawh pa koe ka plak see mee haktiex Edom ka baoh plak jee mai ankix hoik mawh veng Kabazelax, veng Edarax, veng Yagurax,<sup>22</sup> veng Kinax, veng Dimawrax, veng Adada,<sup>23</sup> veng Kedesha, veng Hazaw, veng Itanan,<sup>24</sup> veng Zipha, veng Telem, veng Balot,<sup>25</sup> veng Hazawhatada, veng Kiriote, Hezaron pa mawh veng Hazaw pa prim,<sup>26</sup> veng Amam, veng Shemax, veng Mawlada,<sup>27</sup> veng Hazagadadax, veng Heshamon, veng Bietpaliet,<sup>28</sup> veng Hazashula, veng Berashiba, veng Bikzawtaya,<sup>29</sup> veng Balax, veng Iyim, veng Ezim,<sup>30</sup> veng Elatawlat, veng Khesilax, veng Hawrama,<sup>31</sup> veng Zikalat, veng Madamana, veng Sansana,<sup>32</sup> veng Lebaok, veng Shilahim, veng Aen mai veng Remon khankix heue. Veng khawmuik koe been tixnga dim veng

tau mai yaong khankix heue. <sup>33</sup>Veng pa koe daux ngawd khankix pa mawh veng Eshatawlax, veng Zawra, veng Ashana, <sup>34</sup> veng Zanaw, veng Engganim, veng Tapua, veng Enam, <sup>35</sup> veng Yamok, veng Adulam, veng Sawkhaw, veng Azeka, <sup>36</sup> veng Sharim, veng Aditem, veng Gederax mai veng Gederawtem khankix khawmuik hoik mawh veng kao pon veng tau mai yaong pa koe hawt vungviang veng ankix <sup>37</sup> mai veng Zenan, veng Hadasha, veng Migadalagat, <sup>38</sup> veng Dilan, veng Mizapa, veng Yokathilax, <sup>39</sup> veng Lakhishax, veng Bazakat, veng Egalon, <sup>40</sup> veng Kabun, veng Laman, veng Kedalisha, <sup>41</sup> veng Gedarot, veng Bietdagon, veng Nama mai veng Makeda, khankix khawmuik, pa mawh veng kao liah veng tau mai yaong pa koe hawt vungviang veng ankix <sup>42</sup> mai veng Libanax, veng Eta, veng Ashan, <sup>43</sup> veng Yiphata, veng Ashana, veng Neziba, <sup>44</sup> veng Kilax, veng Akhaziba mai veng Maresha khankix pa mawh veng sidim veng tau mai yaong pa koe hawt vungviang an khawmuik <sup>45</sup> mai veng Ekaron tau mai veng pa dex mai nawh khawm yaong khankix <sup>46</sup> jah khainng veng Ekaron tom hoek ka rawm sigrit sigra, can veng mai yaong khankix khawmuik pa dex vungviang veng Ashadok khankix khawmuik <sup>47</sup> mai veng Ashadok tau mai veng khawm yaong khankix, veng Gaza tau mai veng khawm yaong khankix tom hoek dee singai rawm klawng Ejiptux mai ka rawm sigrit sigra ting tau mai hawt haktiex praok rawm khankix heue. <sup>48</sup> Haktiex pa koe ka piang gawng lua khankix pa mawh veng Shamirax, veng Yatira, veng Sawkhaw, <sup>49</sup> veng Dana, veng Kirayatsana pa mawh veng Debirax, <sup>50</sup> veng Anap, veng Ashatemaw, veng Anim, <sup>51</sup> veng Goshem, veng Hawlom mai veng Gilaw khankix pa mawh veng kao tix veng tau mai yaong pa koe hawt baoh an <sup>52</sup> mai veng Arap, veng Duma, veng Eshan, <sup>53</sup> veng Yanum, veng Bietaupa, veng Apheka, <sup>54</sup> veng Homta, veng Arabax pa mawh veng Hebron mai veng Ziawrax khankix pa mawh veng sidim veng tau mai yaong pa koe hawt

15:63 Cao 1:21, 2Sa 5:6, 1Been 11:4. 16:10 Cao 1:29.

baoh an khawmuik <sup>55</sup> mai veng Maon, veng Khamelax, veng Zipha, veng Yuta, <sup>56</sup> veng Yezarilax, veng Yokadim, veng Zana, <sup>57</sup> veng Ka-inax, veng Giba mai veng Timakhankix pa mawh veng kao veng tau mai yaong pa koe hawt baoh an khankix <sup>58</sup> mai veng Halahula, veng Bietzurax, veng Gedaw, <sup>59</sup> veng Marat, veng Bietanot mai veng Elatekon khankix pa mawh veng liah veng tau mai yaong baoh an khankix khawmuik <sup>60</sup> mai veng Kirayatbalax, pa mawh veng Kirayatyrim mai veng Raba khankix pa mawh veng ra veng tau mai yaong baoh an khawmuik heue. <sup>61</sup> Plak daux tiag veng pa hoik koe ankix tom mawh veng Bietarama, veng Midin, veng Sekada, <sup>62</sup> veng Nibashan, veng Meliet pa mawh veng kix mai veng Enggedi khankix pa mawh veng liah veng tau mai yaong ankix khawmuik heue. <sup>63</sup> Phan mawh ceu pui Yebusix khankix mai can pui pa ot ka daux veng Yerusalim khankix, pui Yudax khankix, ang lai pon grheu kix lih hu heue. Viang mawh nan, pui Yebusix khankix hoik ot tau mai pui Yudax khankix hawt veng Yerusalim tom hoek in singaix heue.

**16 Pa Ot Ka Plak Klip**  
 Niep pa hoik pon kawn praix Yosiep khankix mawh pa jah khaing rawm klawng Yawdan tom hoek ka veng Yerikho mai mee haktiex cie kix deeh hu ka plak dee lih rawm klawng Yerikho ka plak dee lih singaix mai deeh hu ka plak daux tiag deeh haok ti hu khaing veng Yerikho mai hu daux sinax gawng khankix mai hoek ka veng Betelax heue. <sup>2</sup> Khaix an, mee haktiex an deeh lih hu khaing veng Betelax mai hoek ka veng Luza mai mee an deeh tiang ti hu hawt mee haktiex veng Akhitix hawt dee dex mai veng Atarot, <sup>3</sup> mee haktiex deeh lih jee ka plak klip mai ka mee haktiex veng Yaphalet tom hoek ka mee haktiex dee pa nielheu tiem ka veng Biethawron mai hoek ka veng Geza mai mee haktiex an ghoik ti sidah ka rawm sigrit sigra heue. <sup>4</sup> Mawh kheu nan, kawn praix Yosiep, kawn praix Manashe mai Epharim khankix hoik teei ti cie sinngao pa pon kix heue.

**Grawng Haktiex Cie Epharim**

<sup>5</sup> Awm pa koe doeh nyiexmaw kawn praix Epharim khankix, mee haktiex sinngao cie kix mawh

pa koe plaktoh pa mawh veng Atarotada tom hoek ka plak veng Biethawrom khankix heue. <sup>6</sup>Mee haktiex an deeh lih hu ka plak see dee koe rawm sigrit sigra ka plak blaong khaing veng Mekmitat heue. Khaix an, mee haktiex an deeh hu vungviang hawt baoh plak toh mai hoek ka veng Tanatshilaw mai deeh tiang hu hawt plak toh ka veng Yanawha heue. <sup>7</sup>Khaix an, mee haktiex kix deeh lih jee khaing veng Yanawha mai deeh hoek ka veng Atarot mai veng Narax khankix mai deeh lih bleeh ti hoek ka veng Yerikho mai deeh ghoik tix hoek ka rawm klawng Yawdan heue. <sup>8</sup>Mee haktiex kix deeh lih hu khaing veng Tapua pa koe hawt baoh plak klip mai deeh hoek ka rawm klawng iak Kana mai mee haktiex an hu ghoik tix sidah ka rawm sigrit sigra heue. In mawh sinngao cie doehru kawn praix Epharim awm pa koe doeh nyiexma kix heue. <sup>9</sup>Can veng khankix pa hoik goih tix son kawn praix Epharim khankix hoik mawh sinngao pa koe ka daux sinax kawn praix Manashe khawm veng khawm yaong kix khawmuik heue. <sup>10</sup>Viang yuh ka mawx kawx kix ang lai grheu ti tik ceu pui Khananix khankix pa ot ka daux sinax ceu pui Epharim tom hoek ka daux in singaix heue. Kix hoik lih ti mawh siliex pa yuh kaing son kix heue.

## **17** *Doehru Manashe*

Niep pa hoik pon doehru cub Manashe khankix kheu jao hoik mawh nawh kawn Ai Yosiep mawh inkix heue. Makhirax pa mawh kawn Ai Manashe pa mawh keeing Gilat mawh pui naing tix kaux nawh tom pon ka haktiex Gilat mai haktiex Bashan ka nawh heue. <sup>2</sup>Krax pa cawx niep khankix hoik mawh pa caw ka kawn praix pa ghoik khaing cub Manashe awm pa koe doeh nyiexma kix mai son kawn praix Abiza, kawn praix Heliet, kawn praix Asarie, kawn praix Shekhim, kawn praix Hepha mai kawn praix Shemida khankix heue. Inkix mawh kawn simex Manashe pa mawh kawn simex Yosiep awm pa koe doeh nyiexmakix heue. <sup>3</sup>Viang mawh nan, doehru Hepha, Gilat, Makhirax mai Manashe khankix pa mawh Zelophihat ang koe

17:4 Si 27:1-7. 17:12-13 Cao 1:27-28.

kawn simex pie tix kaux kawx mawh ngie kawn sibun khankix pa koe heue. Ceukaux kawn sibun nawh khankix mawh Mala, Nawa, Hawgalax, Milakha mai Tiza khankix heue. <sup>4</sup>Kix hoek sivoe cao giex kaing li Eliaza mai Yawsux pa mawh kawn simex Nun mai cao kuang cao bung khankix mai ah nin, "Simiang Siyiex hoik tawm lox ka Mose sonsang tawx nawh sinngao cie yix khaing daux sinax puxaik yix khankix heue." Mawh kheu nan, awm pa hoik koe gumlox pingnyap Siyiex, nawh hoik tawx sinngao ka kix khaing daux sinax puxaik keeing kix heue. <sup>5</sup>Lheu khaing haktiex Gilat mai haktiex Bashan pa koe plak toi rawm klawng Yawdan khankix, kao son hoik mawh cie cub Manashe khankix heue. <sup>6</sup>Grawh grawng nawh, kawn sibun Manashe khankix hoik mawh pa pon ti cie sinngao khaing daux sinax kawn saux simex Manashe mai kawn simex Manashe pakawn deuk khankix pon ti cie ka haktiex Gilat heue. <sup>7</sup>Haktiex dee kuang Manashe hoik mawh pa jah tix khaing veng Asha tom hoek ka veng Mikmetat pa koe plak toh veng Shekhim heue. Mee haktiex deeh lih hu ka plak jee tom hoek ka dee ot pui veng Engtapua khankix heue. <sup>8</sup>Manashe hoik pon ti cie veng Tapua, viang mawh nan, veng Tapua pa koe piang mee haktiex veng Manashe hoik mawh cie kawn praix cub Epharim khankix heue. <sup>9</sup>Mee haktiex an deeh lih jee ka rawm klawng iak Kana pakoe ka plak jee. Veng cie Epharim inkix mawh pa koe daux sinax veng cie Manashe, haktiex cie Manashe mawh pa koe plak blaong rawm klawng iak an mai mee haktiex an hu ghoik ti sidah ka rawm sigrit sigra heue. <sup>10</sup>Ankix pa koe baoh plak jee hoik mawh cie Epharim, pa koe plak blaong hoik mawh cie Manashe, rawm sigrit sigra hoik mawh mee haktiex heue. Dee kuang Manashe mawh pa sideet mai haktiex veng Asha plak blaong mai haktiex veng Isakhamawh pa koe plak toh heue. <sup>11</sup>Ka daux mee haktiex dee kuang Isakha, Asha mai veng cie Manashe khankix caw ti mawh veng Bietschan khawm yaong khankix, veng Ibalam khawm yaong khankix, can pui pa ot ka daux veng Dawrax

khawm yaong khankix, can pui pa ot ka daux veng Engdawrax khawm yaong khankix, can pui pa ot ka daux veng Tanak khawm yaong khankix mai can pui pa ot ka daux veng Megidaw khawm yaong khankix pa mawh dee koe gawng lua baoh an loe dah heue.<sup>12</sup> Viang mawh nan, kawn praix Manashe khankix ang lai pon grheu pui pa ot ka daux vengankix hu, mawh kheu ceu pui Khananix khankix hoik tat rhawm ti ot ka daux haktiex an heue.<sup>13</sup> Yam hoik kied koe riang rao pui Isarelix khankix, kix ang lai grheu ti tik ceu pui Khananix khawmuik lih khaing tan mai kieh kix tawx keen heue.

***Haktiex Baox Son Epharim Mai Manashe***

<sup>14</sup>Khaix an, kawn praix Yosiep khankix deeh ah nin ka Yawsux, “Mawh kheu jao patix mai lai tawx ngie yix cawk niep sonsang pon yix sinngao tix dah khaing yuh ka mawx? Yix kawx hoik mawh cub pui pa kied ting tix cub awm pa hoik nawb Simiang Siyiex buanson ka yix tomnie heue.”<sup>15</sup> Mawh kheu nan, Yawsux deeh pawk ah nin, “Phan pex mawh cub pui pa kied ting tix cub, pex hu ka plak haktiex daux nong khankix mai soh dahdee son pex ka daux haktiex ceu pui Parazix mai dee ot cub pui pa ting lhaong khankix, kheu hoik kied sikhox baoh gawng lua Epharim ka son pex heue.”<sup>16</sup> Kawn praix Yosiep khankix deeh ah nin, “Haktiex gawng lua an khankix ang lai kub son yix, pielinglawx brung naing ceu pui Khananix pa yuh ka rhiem hoik ot ka daux ngawd daux lung, khawm pui pa ot ka daux veng Bietschan mai khawm yaong khankix mai khawm can pui pa koe ka daux ngawd veng Yezerelax khankix hoik naog tan heue.”<sup>17</sup> Yawsux deeh krai ka doeh nyiexma Yosiep mai khawm doeh nyiexma Epharim mai Manashe khankix ah nin, “Pex mawh cub pui pa kied ting mai pa kied ting riang heue. Pex tak ang khaw ti pon niep tix mu ngie,<sup>18</sup> haktiex piang gawng lua khankix tak mawh cie pex heue. Viang dee ankix mawh pa kied haoh khaox ox kawx pex tak kid ti tik, haktiex pa sang deeh baox nie vieh ankix tak mawh cie pex heue. Viang ceu pui Khananix mawh pa hoik koe linglawx brung naing pa yuh ka rhiem mai kix mawh pa kied ting

riang rao kawx, pex tak mawh pa grheu ti tik kix khaing tan heue.”

**18 *Goih Haktiex Pa Kawn Deuk***

Khaix an, cub pui hun Isarelix khawmuik khrawm paox tix tau ka veng Shilaw mai sum nyiex gox buan man bang kum tan heue. Pui haktiex khankix hoik ot ka greem pa kuang kix heue.<sup>2</sup> Khaing daux sinax doehru pui Isarelix khankix pa kawn deuk aliah cub, pa ang nyang bax pon ti rieb sinngao cie tix kawn koe heue.<sup>3</sup> Kheu nan, Yawsux deeh ah nin ka pui Isarelix khankix, “Pex ang cu ti hu mai teei ti cie haktiex pa hoik tawx Simiang Siyiex ka keeing pex khankix glanggleeing yuh ka mawx lie?”<sup>4</sup> “Laug ti teei pui loe kaux khaing daux sinax pex, son doehru pex ku cub mai aux tak ploie kix hu, kix tak yaog ti hu hoek ka haktiex kudah, tiem ti viex grawng haktiex ankix awm pa simie kix tix pon sinngao cie kix mai hoek ka aux.<sup>5</sup> Kix tak goih haktiex ankix aliah son, ceu pui Yudax tak mawh pa kawn ot ka dee kuang kix ka plak jee mai doeh nyiexma Yosiep tak mawh pa kawn ot ka haktiex dee kuang kix ka plak blaong heue.<sup>6</sup> Mawh kheu nan, pex tak goih haktiex an aliah son mai viex rieang haktiex an hoek ka aux tin sonsang pon aux ti kieh pex cawk niep ka son tokaux pex tin, ka plak sivoe ngai Simiang Siyiex ex heue.<sup>7</sup> Viang mawh nan, pui Lewix khankix tak mawh pa ang pon ti cie tix son kawx khaing daux sinax pex, grawh grawng nawh, grawng pa yuh kix cao giex kaing li Simiang Siyiex hoik mawh sinngao pa pon kix heue. Ceucad Gat, ceucad Rubin mai doe ru Manashe khankix tix plak, hoik mawh pa pon sinngao cie tix ka plak toi rawm klawng Yawdan ka plak toh, pa hoik tawx Mose pa mawh kawncaw Simiang Siyiex ka kix heue.”<sup>8</sup> Khaix an, pui khankix yaog ti kaoh mai hu ka dee singai mai Yawsux tawm lox ka pui pa hu sawg ti tiem mhai haktiex khankix ah nin, “Hu lailing ti jhak haktiex kudah mai yuh rieang haktiex ankix mhawm mhawm mai deeh hoek ka aux, sonsang pon yuh aux ti tawx krax pa cawk niep ka son pex ka plak sivoe Simiang Siyiex ka daux veng Shilaw tin heue.”<sup>9</sup> Mawh kheu nan, pui ankix

hu ka daux haktiex ankix kudah mai tiem mhai tix viex rieang haktiex aliah son, ka daux phuk lai tix mu awm pa koe veng an khankix heue. Kix deeh hoek ka Yawsux ka dee bang kix ka daux veng Shilaw heue.<sup>10</sup> Khaix an, Yawsux yuh krax pa cawk niep ka son kix ka daux veng Shilaw ka plak sivoie Simiang Siyiex heue. Yawsux goih ti tawx haktiex ka pui Isarela relax khankix tan awm pa koe cub kix heue.

### ***Haktiex Cie Benyamin***

<sup>11</sup>Yam in, niep cie doeh pui Benyamin khankix mawh pa caw ti lih sivoie awm pa koe doeh nyiexma kix heue. Haktiex dee pa kuang kix, hoik mawh pa lih khaing pa caw kix niep ka daux sinax kawn praix Yudax khankix mai kawn praix Yosiep khankix heue.<sup>12</sup> Haktiex cie kix ka plak blaong mawh pa jah tix ka rawm klawng Yawdan mai mee haktiex an deeh hu ka praok veng Yerikho ka plak blaong heue. Mee haktiex an, deeh lih hu ka piang gawng khankix pa koe ka plak klip tom hu sidah ka daux tiag Bietavin heue.<sup>13</sup> Mee haktiex kix deeh hu khaing tan mai hu ka plak see veng Luza mai tiang hawt praok veng Luza pa mawh veng Betelax ka baoh plak jee heue. Mee haktiex deeh lih hu ka plak veng Atarot pa dex mai gawng khankix pa koe ka plak jee mai ka dee tiem haktiex hawt veng Biethawron heue.<sup>14</sup> Khaix an, mee haktiex deeh baox jawn ti lang khaing tan, hawt vungviang plak klip mai hoek ka baoh plak jee khaing plak greem caong gawng Khanan mai deeh hu sidah ka veng Kirayatbalax pa mawh veng Kiratyarim pa mawh veng pui Yudax tix veng heue. In mawh mee haktiex pa koe plak klip heue.<sup>15</sup> Mee haktiex plak jee mawh pa jah tix ka dee sidah veng Kiratyarim mai mee haktiex an deeh sitoie ti hu ka plak klip mai deeh lih hu ka dee lih rawm keut Nephataw heue.<sup>16</sup> Khaix an, mee haktiex an deeh lih jee mai hu ka plak dee sidah gawng khankix pa koe ka plak sivoie daux ngawd kawn simex Hinnun pa koe ka daux ngawd ceu pui Epharim ka plak blaong, mai mee haktiex an, deeh lih ka daux ngawd

19:2-8 1Been 4:28-33.

Hinnun mai hoek ka praok veng ceu pui Yebusix ka baoh plak jee mai mee haktiex an deeh lih hu ka yaong Engrawgalax heue.<sup>17</sup> Mee haktiex an, deeh hu hawt vungviang plak blaong mai deeh lih ka yaong Engshemiet mai deeh sitoie tix lang tom hoek plak see yaong Gelilot pa koe ka praok caong gawng Adumim mai deeh lih ka simaox Bawhan pa mawh kawn simex Rubin heue.<sup>18</sup> Khaix an, mee haktiex deeh tiang ti hu hawt see plak blaong veng Arabax mai deeh lih jee ka veng Arabax heue.<sup>19</sup> Mee haktiex deeh tiang ti hu ka plak blaong veng Biethawgalax heue. Khaix an, mee haktiex deeh hu sidah ka dee kaw krawm plak blaong rawm sigrit sigra kih, hawt dee sidah rawm klawng Yawdan ka plak jee heue. In mawh mee haktiex kix ka plak jee heue.<sup>20</sup> Rawm klawng Yawdan hoik mawh mee haktiex plak toh heue. In hoik mawh sinngao cub pui Benyamin khankix, awm pa hoik koe mee haktiex kix hawt vungviang baoh tan khawmuik mai awm pa koe doeh nyiexma kix heue.<sup>21</sup> Yam in, veng cie doeh pui Benyamin khankix, awm pa koe doeh nyiexma kix hoik mawh veng Yerikho, veng Biethawgalax, veng Emietkezix,<sup>22</sup> veng Bietarabax, veng Zamarem, veng Betelax,<sup>23</sup> veng Avin, veng Para, veng Ophara,<sup>24</sup> veng Khephahamawni, veng Ophani mai veng Gaba khankix, pa mawh veng kao ra veng tau mai yaong pa koe hawt vungviang nawh khankix,<sup>25</sup> veng Gibon, veng Ramax, veng Berut,<sup>26</sup> veng Mizapa, veng Khephirax, veng Mawzax,<sup>27</sup> veng Rekim, veng Irapelax, veng Taralax,<sup>28</sup> veng Zelax, veng Alat, veng Yebusix pa mawh veng Yerusaliem, veng Gibat mai veng Kirayat khankix pa mawh veng kao pon veng tau mai yaong pa koe hawt vungviang veng an khankix heue. In mawh sinngao cie kawn praix Benyamin khankix, awm pa koe doeh nyiexma kix heue.

### **19 *Sinngao Cie Simeon Mai Yudax***

Krax pa cawk niep ra bawg tix bawg hoik mawh pa caw ka Simeon mai ka son doehru kawn praix nawh khankix awm pa koe doeh nyiexma kix heue. Sinngao cie kix hoik mawh pa koe ka daux sinngao cie pui Yudax khankix heue.<sup>2</sup> Can veng khankix pa mawh

sinngao cie kix hoik mawh veng Berashibax, veng Shebax, veng Mawlada, <sup>3</sup> veng Hazashula, veng Bala, veng Azim, <sup>4</sup> veng Elatawlax, veng Betulax, veng Hawma, <sup>5</sup>veng Zigalax, veng Bietmakhobok, veng Hazasusa, <sup>6</sup>veng Bietlebot mai veng Sharuhim khankix pa mawh veng kao loe veng mai yaong hawt vungviang an khankix, <sup>7</sup> veng A-inax , veng Rimon, veng Eta mai veng Ashan khankix pa mawh veng pon veng mai yaong pa koe hawt vungviang veng an khankix <sup>8</sup> mai yaong khankix pa koe hawt vungviang veng inkix khawmuik, tom hoek dee singai ka veng Balietber Ramat, pa koe ka plak jee heue. In hoik mawh sinngao cie doeh kawn praix Simeon khankix awm pa koe doeh nyiexma kix heue. <sup>9</sup> Sinngao cie kawn praix Simeon khankix, mawh pa viex ka daux nyum cie kawn praix Yudax khankix heue. Grawh grawng nawh, nyum pa pon kawn praix Yudax khankix hoik mawh pa kied nie ka son kix, mawh kheu sinngao ciekawn praix Simeon khankix hoik mawh pa koe daux sinngao cie pui ankix heue.

#### ***Haktiex Cie Zebulun***

<sup>10</sup>Krax pa caw kix niep loe bawg tix bawg hoik mawh pa caw son kawn praix ceu pui Zebulun awm pa koe doeh nyiexma kix heue. Mee haktiex sinngao cie kix hoek tom dee singai ka veng Sarit heue. <sup>11</sup>Mee haktiex cie kix lih hu ka see plak klip mai hoek ka veng Maralax mai kaoh khaing tan deeh lih hu ka veng Dabasiet mai deeh toe ti hu hawt rawm klawng pa koe ka plak toh veng Yokanam heue. <sup>12</sup>Khaix an, mee haktiex deeh jah tix ka veng Sarit mai deeh hu see ka plak toh hawt mee haktiex veng Khishalottebaw mai deeh lih hu ka plak see veng Debarat hawt dee tiang nawh ka veng Yaphia heue. <sup>13</sup>Jah khaing tan, deeh tiang ti hu hawt plak toh ka veng Gathepha mai hu ka plak see veng Itakazin mai deeh sitoe tix lang tom hoek ka veng Rimon pa koe ka piang mee haktiex veng Nea heue. <sup>14</sup> Mee haktiex an, deeh hu hawt vungviang plak blaong veng Hanaton mai deeh hu sidah ka daux ngawd Yiphatela <sup>15</sup> mai can pa viex ka daux an khankix hoik mawh veng Katat, veng Nahalelax, veng Shimaron, veng Idala mai veng Bielehiem pa

mawh veng kao ra veng tau mai yaong pa koe hawt vungviang nawh khankix heue. <sup>16</sup> In mawh sinngao cie kawn praix Zebulun khankix awm pa koe doeh nyiexma kix tau mai veng inkix khawm yaong pa koe hawt vungviang nawh khankix heue.

#### ***Haktiex Cie Isakha***

<sup>17</sup> Krax pa caw kix niep pon bawg tix bawg hoik caw ka son Isakha mai son kawn praix Isakha khankix awm pa koe doeh nyiexma kix heue. <sup>18</sup> Mee haktiex dee kuang kix deeh lih hu ka plak veng Yezarilax mai viex khawm veng Khesulut mai veng Shunim, <sup>19</sup> veng Hapharim, veng Sihon, veng Anaharat, <sup>20</sup> veng Rabbit, veng Kishon, veng Abeza, <sup>21</sup>veng Hamiet, veng Enganim, veng Enhada mai veng Bietpaziet khankix, <sup>22</sup> mee haktiex an deeh hoek ka veng Tebaw, veng Shahazima mai veng Bietshemiet khankix heue. Mee haktiex kix deeh hu sidah ka rawm klawng Yawdan tau mai veng khankix kao liah veng khawm yaong pa koe baoh an khankix heue. <sup>23</sup> In mawh sinngao cie doeh kawn praix Isakha khankix awm pa koe nyiexma kix tau mai veng khawm yaong cie kix khawmuik heue.

#### ***Haktiex Cie Asha***

<sup>24</sup>Krax pa caw kix niep phuan bawg tix bawg, hoik mawh pa caw ka son doehru kawn praix cub Asha khankix, awm pa koe doeh nyiexma kix heue. <sup>25</sup> Mee haktiex dee kuang kix, viex nawh khawm veng Helakat, veng Halix, veng Betin, veng Akhashapha, <sup>26</sup> veng Alameliet, veng Amat mai veng Mishalax khankix heue. Mee haktiex an deeh hoek ka gawng Kharamelax ka plak klip mai deeh hu hawt dee lih rawm klawng Shihawlibanat heue. <sup>27</sup> Mee haktiex an, deeh veeh ti hu ka plak see plak toh veng Bietdagon mai hoek ka veng Zabulun mai deeh hu ka plak daux ngawd Yephatela, khaix an, mee haktiex deeh hu ka plak blaong ka plak toi veng Bietemiet mai veng Nielax mai deeh tiang ti hu hawt veng Khabulax pa koe kaplak khawn goix <sup>28</sup> mai deeh viex nawh khawm veng Ebaron, veng Rehok, veng Hamon mai veng Kanax, tom hoek ka veng ting Sidom heue. <sup>29</sup> Mee haktiex deeh veeh ti hu ka plak veng Ramax mai ka veng Tairax, pa kok mawh Turax pa mawh veng pa kauxcong tan heue. Mee haktiex an deeh

veeh ti hu ka veng Hawsax mai mee haktiex an deeh hu sidah ka rawm sigrit sigra hawt baoh haktiex veng Akhazip heue. <sup>30</sup> Veng Umma, veng Aphiet mai veng Rebok khankix mawh veng pa hoik viex ka dauh veng tixnga ra veng tau mai yaong pa koe hawt vungviang veng an khankix heue. <sup>31</sup> In mawh sinngao cie doehru kawn praix Asha awm pa koe doeh nyiexma tau mai veng inkix khawm yaong inkix khawmuik heue.

### ***Haktiex Cie Naphthalix***

<sup>32</sup> Krax pa cawk niep liah bawg tix bawg hoik mawh pa caw ka kawn praix ceu pui Naphthalix awm pa koe doeh nyiexma kix heue. <sup>33</sup> Mee haktiex cie kix hoik mawh pa jah tix ka veng Helap mai khawm plak dauh haktiex dee kuang nawh khankix khaing dee koe khaox gix hawt veng Zanim, veng Adami, veng Nekap mai veng Yabanelax tom hoek ka veng Lakum mai mee haktiex an hu sidah ka rawm klawng Yawdan heue. <sup>34</sup> Jah khaing veng Helap, mee haktiex an deeh sitioe ti lang mai hu ka plak klip veng Azanottabaw mai deeh lih khaing tan mai hu ka plak see veng Hukok heue. Mee haktiex an deeh sitioe tix ka veng Zebulun ka plak jee mai ka veng Asha hawt plak klip mai mee nawh hu sidah ka haktiex Yudax, hawt rawm klawng Yawdan ka see plak lih singaix khaing tan heue. <sup>35</sup> Veng pa kauxcong nawh khankix, mawh veng Zidim, veng Zerax, veng Hamat, veng Rakat, veng Khinatariet khankix <sup>36</sup> mai veng Adama, veng Ramax, veng Hazaw, <sup>37</sup> veng Kadeshax, veng Adarix, veng Enhazaw, <sup>38</sup> veng Iron, veng Migadalelax, veng Hawrim, veng Bietanat mai veng Bietshemiet khankix, pa mawh veng kao dim veng, tau mai yaong pa koe hawt rawbrim nawh khankix heue. <sup>39</sup> In mawh sinngao cie doehru kawn praix ceucad Naphthalix khankix awm pa koe doeh nyiexma kix khawm veng khawm yaong kix khankix heue. <sup>40</sup> Krax pa cawk niep aliah bawg tix bawg hoik mawh pa caw ka kawn praix Dan khankix awm pa koe doeh nyiexma kix heue. <sup>41</sup> Mee haktiex sinngao cie kix hoik mawh veng Zawrax, veng 19:47 Cao 18:27-29. 20:1-9 Si 35:6-32, Pi 4:41-43, 19:1-13.

Eshatawlax, veng Irashemiet, <sup>42</sup> veng Shalabin, veng Ayalon, veng Yetalax, <sup>43</sup> veng Elon, veng Tima, veng Ekaron, <sup>44</sup> veng Elateka, veng Gibaton, veng Balap, <sup>45</sup> veng Yehot mai veng Benaberiet, veng Gatarimon, <sup>46</sup> veng Meyakon mai veng Rekon tau mai baoh haktiex Yawppa khankix heue. <sup>47</sup> Mawh kheu sikhox mee haktiex cie kawn praix Dan khankix kix tom hu puing ti teei veng Lieshem mai rhim ti cie veng an mai kix pah ti tik pui ankix ka lawm vaid mai teei ti cie kraung kix mai kix ot ka dauh veng an, kix deeh kok ceukaux veng Lieshem mawh veng Dan, khaix ceukaux Dan pa mawh keeing kix heue. <sup>48</sup> In mawh sinngao cie doehru kawn praix Dan khankix awm pa ke doeh nyiexma kix, khawm veng khawm yaong kix khankix heue. <sup>49</sup> Yam khaix hoik sidah goih kix haktiex khankix pa mawh sinngao pa pon kix mai awm hoik koe mee haktiex kix pui Isarelix khankix, deeh tawx sinngao pa koe dauh sinax kix tix dah ka Yawsux pa mawh kawn simex Nun heue. <sup>50</sup> Awm pa koe gumlox tawm Siyiex, kix hoik tawx veng pa mhaing nawh ti cie heue. Veng an mawh veng Tinatserax pa koe ka piang gawng Epharim mai nawh sum ti cie veng mai ot ka dauh veng an heue. <sup>51</sup> Inkix mawh sinngao pa hoik goih cao giex kaing li Eliaza, Yawsux pa mawh kawn simex Nun mai cao kaing doh doe ru pui Isarelix khankix, awm sinngao pa hoik cawk kix niep ka dauh veng Shilaw, ka plak sivoie Siyiex hawt diang siviex nyiex gox buan man bang kum heue. Mawh kheu nan, krax pa goih kix haktiex hoik sidah heue.

### ***20 Veng Dee Bang Peung Pui To***

Simiang Siyiex baoh deeh sikah ka Yawsux ah nin, <sup>2</sup> Krai ka pui Isarelix khankix ah nin ka kix, laug ti deuh veng son pui to khankix ka son tokaux pex awm pa hoik krai Aux ka Mose son pex, <sup>3</sup> sonsang pon to pui pa pah pui tix klawd tan pa mawh pui tix kaux kaux, ka dauh pa ang nawh bak ti yuh, phan ang mawh nan, ka dauh pa ang koe rhawm ti yuh heue. Kix tak mawh pa hoek ti peung buan maix khaing pui pa pawk bix nham tix heue. <sup>4</sup> Yam to nawh ti klawd ka veng ankix tix veng veng mai phan nawh cung hawt

diang siviex veng mai phan nawh pao tix krai grawng hoek tix ka kuad pui riex ju veng an khankix mhong, kix tak teei nawh laig ka dauh veng mai tawx dee ot tix dah ka son nawh, sonsang pon nawh ti ot ka dauh sinax kix heue. <sup>5</sup> Khaix an, phan cao pa pawk bix nham tix hawt khaix nawh, kix tak ang pon ti ap ka kaw pa pah pui yum an, ka dauh tawm taix kix heue. Nawh mawh pa pah paox plawgtix ka dauh krax ang ti koe rhawm pa sang keud ti yuh mai ka dauh ang ti koe krax pa koeng ka nawh, sivoie sang hoek taix ka nawh heue. <sup>6</sup> Nawh tak yaox ti ot ka dauh veng an tom hoek bawgyam yaox nawh ti cung ka plak sivoie pui hun khankix son krax prawng ciyang mai tom hoek bawgyam hoik yum cao giex kaing li pa ting tix kaux, khaing dauh sinax kix ka dauh singaix ankix heue. Khaix an, pui pa pah pui tak pon ti deeh ing mai hoek ka veng dee ot tix ka nyiex tokaux nawh khaing veng pa hoik to nawh ti klawd heue.” <sup>7</sup> Mawh khu nan, kix deuh ti priex veng Kadeshax ka dauh haktiex meung Galilie pa koe ka piang gawng Napthalix mai veng Shekxim, pa koe ka piang gawng Epharim mai veng Kiratarabax pa mawh veng Hebron pa koe ka piang gawng Yudax khankix heue. <sup>8</sup> Ka plak toi rawm klawng Yawdan kix hoik laug ti deuh veng Beza pa koe ka dauh tiag mai pa koe ka dauh lung ka dee ot doehru pui Rubin khankix hawt plak toh veng Yerikho heue. Kix deeh laug ti deuh veng Ramot pa koe dauh haktiex Gilat, khaing dee ot doehru pui Gat khankix mai veng Golan pa koe dauh haktiex Bashan, khaing dee ot doehru pui Manashe khankix heue. <sup>9</sup> Inkix hoik mawh veng pa hoik laug kix ti deuh son pui Isarelax khankix mai son nyosinie pa hoek ti ot sinax kix been tivud ticu heue. Mawh khu nan, kaw pa hoik pah pui tix kaux kaux ka dauh pa ang tix koe rhawm keud ti sang yuh ceu ankix tak pon to ti klawd tan mai sonsang ang nawh pon ti yum ka taix pui pa pawk bix nham tix tom hoek bawgyam cung nawh ka plak sivoie cub pui hun khankix heue.

21:2 Si 35:1-8.

**21** *Veng Cie Lewix* (1*Been* 6:54-81)  
 Khaix an, cao kaing pui Lewix, hoek ka cao giex kaing li Eliaza, ka Yawsux pa mawh kawn simex Nun mai cao giex kaing doehru pui Isarelax khankix heue. <sup>2</sup> Kix ah nin ka kix dauh veng Shilaw pa koe dauh haktiex meung Khanan, “Simiang Siyiex hoik tawm lox ka Mose sonsang tawx nawh veng pa sang ot yix tau mai haktiex dee sawm tobrie eei yix khankix heue. <sup>3</sup> Mawh khu nan, pui Isarelax khankix hoik tawx veng mai haktiex ka son ceucad Lewix khaing sinngao pa hoik pon kix awm pa hoik koe lox tawm Simiang Siyiex heue. <sup>4</sup> Krax pa cawk niep hoik mawh pa caw ka cub doeh nyiexma Kawhat khankix heue. Mawh khu nan, kawn praix cao giex kaing li Arun pa mawh cub pui Lewix khankix hoik pon ti cie veng kao loe veng khaing pa cawk kix niep ka dauh haktiex doehru cub pui Yudax mai khaing dauh haktiex doeh cub pui Simeon mai khaing ka dauh haktiex doehru cub pui Benjamin khankix heue. <sup>5</sup> Kawn praix Kawhat pa kawn deuk khankix hoik mawh pa pon ti cie veng kao veng ka dauh pa hoik cawk kix niep khaing doeh nyiexma cub pui Epharim mai khaing dauh doehru cub pui Dan mai khaing dauh doehru Manashe an tix plak heue. <sup>6</sup> Kawn praix Geshon khankix hoik pon ti cie veng kao loe veng ka dauh pa cawk niep khaing dauh doeh nyiexma cub pui Isakha mai khaing dauh doehru Asha mai khaing dauh doehru cub pui Napthalix mai khaing dauh doehru cub pui Manashe pa koe tix plak ka dauh haktiex Bashan heue. <sup>7</sup> Kawn praix cub pui Merarix hoik pon ti cie veng kao ra veng, awm diag pa koe doeh nyiexma kix khaing dauh doehru Rubin mai khaing dauh doehru Gat mai khaing dauh doehru Zebulun khankix heue. <sup>8</sup> Pui Isarelax khankix tawx veng inkix tau mai haktiex dee sawm pui hun kix ka dauh pa cawk niep son ceu pui Lewix khankix awm lox pa hoik tawm Simiang Siyiex ka Mose heue. <sup>9</sup> Kix hoik tawx can pa koe khaing doehru Yudax khankix mai khaing pa koe dauh doehru Simeon pa mawh veng inkix pa hoik krai kix ti deuh awm pa hoik sum ceukaux

heue. <sup>10</sup>Phan mawh son kawn praix Arun pa mawh doeh nyiexma Kawhat tix cub mai pa mawh kawn praix ceucad Lewix khankix caw ti mawh pa pon pa hoik cawk niep phao voe heue. <sup>11</sup>Kix hoik tawx veng Kirayatarabax, Arabax mawh keeing Anagax pa mawh Hebron yam in pa koe pianggawng Yudax khankix tau mai haktiex pa koe hawt rawbrim veng kix heue. <sup>12</sup>Viang mawh nan, kix tawx tong kaung pa koe hawt vungviang veng an ka Kaliep pa mawh kawn simex Yephunie awm pa pon nawh sinngao cie tix heue. <sup>13</sup>Kix hoik tawx veng Hebron pa mawh veng dee peung pui to khaing krax pa pah pui tau mai haktiex pui hun hawt praok veng khankix, khawm veng Libanax tau mai haktiex pa koe hawt vungviang an khankix tawx son kawn praix cao giex kaing li Arun, <sup>14</sup>veng Yatix mai haktiex pui hun nawh mai veng Eshatamaw tau mai haktiex pui hun nawh khankix <sup>15</sup>mai veng Hawlon tau mai haktiex pa koe hawt vungviang an khankix mai veng Debirax tau mai haktiex pui hun nawh khankix <sup>16</sup>mai veng A-inax tau mai haktiex pa koe hawt vungviang haktiex nawh khankix, veng Yuta tau mai haktiex pa koe hawt vungviang an khankix mai veng Bietshemiet tau mai haktiex pa koe hawt vungviang an khankix, pa mawh veng dim veng khaing daux doehru kix ra cub <sup>17</sup> mai khaing doehru Benyamin pa mawh veng Gibon tau mai haktiex pa koe hawt vungviang an khankix, khawm veng Geba tau mai haktiex pa koe hawt vungviang veng nawh khankix, <sup>18</sup>veng Anatot tau mai haktiex pa koe hawt vungviang an khankix mai veng Elamon tau mai haktiex pa koe hawt vungviang an khankix pon veng. <sup>19</sup>Can veng cie kawn praix cao giex kaing li Arun khankix khawmuik koe kao loe veng tau mai haktiex pa koe hawt vungviang an khankix heue. <sup>20</sup>Doeh nyiexma kawn praix Kawhat pa mawh ceucad Lewix khankix mai khawm kawn praix Kawhat pa kawn deuk khankix hoik pon ti cie veng khankix khaing daux doehru Epharim awm pa hoik pon kix pa cawk niep heue. <sup>21</sup>Grawh grawng nawh, kix hoik tawx veng Shekhem tau mai haktiex

pa koe hawt vungviang an khankix pa koe ka piang gawng Epharim ka son kix, veng Epharim mawh veng tix veng son pa sang peung kaw pa pah pui khankix ti ot mai veng Gaza tau mai haktiex pa koe hawt vungviang an khankix, <sup>22</sup>veng Kibazem, tau mai haktiex pa koe hawt vungviang an mai veng Biethawron tau mai haktiex pa koe hawt vungviang an khankix pon veng <sup>23</sup> mai khaing daux doehru Dan, kix pon ti cie veng Elateka tau mai haktiex pa koe hawt vungviang an, veng Beton tau mai haktiex pa koe hawt vungviang an, <sup>24</sup>veng Ayalon tau mai haktiex pa koe hawt vungviang an mai veng Garimon tau mai haktiex pa koe hawt vungviang an khankix pon veng <sup>25</sup> mai khaing daux cie doehru Manashe tix plak, kix pon ti cie veng Tanak tau mai haktiex pa koe hawt vungviang an mai veng Gatrimon tau mai haktiex pa koe hawt vungviang an ra veng heue. <sup>26</sup>Veng ankix kao veng tau mai haktiex pa koe hawt vungviang an khankix hoik mawh son doeh nyiexma kawn praix Kawhat khankix pa kawn deuk heue. <sup>27</sup>Kason kawn praix Geshon khaing daux doeh nyiexma ceucad Lewix, pa mawh doehru Manashe pa kawn deuk tix plak, kix hoik tawx veng Gulan pa koe ka daux haktiex Bashan tau mai haktiex pa koe hawt vungviang an, veng Galon mawh dee peung kaw pa pah pui tix veng mai veng Beshatarax tau mai haktiex pa koe hawt vungviang an khankix ra veng <sup>28</sup> mai khaing daux cie doehru Isakha, kix pon ti cie veng Kishon tau mai haktiex pa koe hawt vungviang an, veng Daberat, tau mai haktiex pa koe hawt vungviang an khankix, <sup>29</sup> veng Yamut tau mai haktiex pa koe hawt vungviang an mai veng Enganin tau mai haktiex pa koe hawt vungviang an khankix pon veng <sup>30</sup> mai khaing daux cie doehru Asha, kix pon ti cie veng Mishalax tau mai haktiex pa koe hawt vungviang an, veng Abadon tau mai haktiex pa koe hawt vungviang an, <sup>31</sup>veng Helikat tau mai haktiex pa koe hawt vungviang an mai veng Rehawbax tau mai haktiex pa koe hawt vungviang an khankix pon veng <sup>32</sup> mai khaing daux cie doehru Napthalix, kix pon ti cie veng

Kedesha pa koe ka daux haktiex meung Galilie tau mai haktiex pa koe hawt vungviang an, veng Kadesha mawh veng tix mu son dee peung kaw pa pah pui mai veng Hamotdawrax tau mai haktiex pa koe hawt vungviang an mai veng Katan tau mai haktiex pa koe hawt vungviang an khankix loe veng heue. <sup>33</sup>Veng cie ceu pui Geshon khankix khawmuik, awm krax pa koe doeh nyiexma kix hoik mawh pa koe kao loe veng tau mai haktiex pa koe hawt vungviang an khankix heue. <sup>34</sup>Ka son doeh nyiexma kawn praix ceu pui Merarix pa mawh ceucad Lewix khankix pa kawn deuk sinax kix mai pa kaoh khaing doehru Zebulun khankix, kix pon ti cie veng Yokanam tau mai haktiex pa koe hawt vungviang an, veng Kata tau mai haktiex pa koe hawt vungviang an khankix, <sup>35</sup>veng Dimanax tau mai haktiex pa koe hawt vungviang an mai veng Nahanelax tau mai haktiex pa koe hawt vungviang an khawmuik pon veng <sup>36</sup>mai khaing daux cie doehru Rubin khankix, kix pon ti cie veng Beza mai haktiex pa koe hawt vungviang an, veng Yahaza tau mai haktiex pa koe hawt vungviang an, <sup>37</sup>veng Kedemot tau mai haktiex pa koe hawt vungviang an mai veng Mephat tau mai haktiex pa koe hawt vungviang an khankix khawmuik pon veng heue. <sup>38</sup>Khaing daux cie doehru Gat khankix, kix pon ti cie veng Ramot pa koe ka daux haktiex Gilat pa mawh veng tix mu son dee peung kaw pa pah pui tau mai haktiex pa koe hawt vungviang an mai veng Mahanem tau mai haktiex pa koe hawt vungviang an khankix, <sup>39</sup>veng Heshabon, tau mai haktiex pa koe hawt vungviang an mai veng Yaza tau mai haktiex pa koe hawt vungviang an khankix pon veng khawmuik heue. <sup>40</sup>Mawh kheu nan, can veng khawmuik, son kawn praix ru Merarix khankix, awm pa koe doeh nyiexma kix pa mawh kawn doeh nyiexma pa kawn deuk khaing ceucad Lewix khankix pa hoik pon kix tix cie mawh veng kao ra veng ka daux pa hoik cawk kix niep heue. <sup>41</sup>Can veng cie pui Lewix khawmuik pa koe ka daux cie kawn praix ceu pui Isarelix khankix, hoik mawh pa koe tixpon daix veng tau mai haktiex pa koe hawt

vungviang kix heue. <sup>42</sup>Veng inkix ku veng hoik mawh pa koe ka daux haktiex hawt vungviang veng heue. Mawh kheu nan, veng inkix hoik mawh cie kix khawmuik heue.

### *Lox Sijax Mukheu Grumnaog*

<sup>43</sup>Mawh kheu nan, Simiang Siyiex hoik tawx haktiex inkix khawmuik ka ceu pui Isarelix khankix, ka pa hoik tiextu Nawh Cao ti tawx ka keeing kix mai sonsang teei kix ti cie mai ot ka haktiex an heue. <sup>44</sup>Simiang Siyiex hoik tawx can pa kawn deuk hawt vungviang haktiex an ka kix khawmuik awm pa hoik tiextu Nawh Cao ka keeing kix heue. Pui tix kaux kawx, khaing daux pui pa koeng kix takang pon ti cung ka plaksivoe kix heue. Grawh grawng nawh, Simiang Siyiex hoik ap ti tawx pui koeng kix khawmuik ka daux tawm taix kix heue. <sup>45</sup>Gumlox sijax mukheu pa mhawm pa hoik tawm Simiang Siyiex ka nyiexma ceu pui Isarelix khankix pa yawm pa ang yuh ang koe tix ceu kawx mai hoik mawh pa grumnaog khawmuik heue.

### **22** *Ru Plak Toh Deeh Ing*

Khaixan, Yawsux kok ka ceucad Rubin, ceucad Gat mai ceucad Manashe tix plak <sup>2</sup>mai nawh ah nin ka kix, "Pex hoik priex ti hawt lox pa hoik tawm Mose pa mawh kawncau Simiang Siyiex ka pex khawmuik mai pex hoik cu nghiet ka lox kraik aux khawmuik awm pa hoik tawm aux ka pex heue. <sup>3</sup>Pex hoik mawh pa ang tie prah ka puxaik tix daux glang ka singaix mai tom hoek daux in singaix mai pex hoik priex ka lox tawm pingnyap Simiang Siyiex tix heue. <sup>4</sup>Yam in, Simiang Siyiex pex hoik tawx krax pa ot nhim ka puxaik pex khankix awm lox sijax mukheu pa hoik yuh Nawh Cao tau mai pex heue. Mawh kheu nan, yam in, pex deeh ing mai hu ka nyiex gox pex khankix mai deeh hu ka haktiex cie pex pa hoik tawx Mose pa mawh kawncau Simiang Siyiex ka pex ka plak toi rawm klawng Yawdan heue. <sup>5</sup>Rien rhawm tix, cu nghiet ka lox pingnyap mai been pa hoik tawm Mose pa mawh kawncau Simiang Siyiex ka pex mai sonsang moh pex ka Simiang Siyiex tix mai sonsang hawt pex daux krax pa jhi Nawh Cao mai sonsang priex pex ti

hawt gumlox tawm pingnyap Nawh Cao khankix mai sonsang giex pex ti priex Nawh Cao tom kauxcong mai yuh kaing Nawh Cao khawm rhawm tix mai khawm ju tix khawmuik heue.”<sup>6</sup> Mawh kheu nan, Yawsux hoik nawb buan ka piang kix mai ploi kix ing ka daux nyiex bang tix heue.<sup>7</sup> Yam in, son doehru Manashe tix plak, Mose hoik tawx haktiex cie kix ka daux haktiex Bashan heue. Son pa kawm deuk an tix plak, Yawsux hoik tawx haktiex cie kix tix dah ka daux cie puxaik kix, pa koe ka plak see rawm klawng Yawdan, hawt baoh plak klip heue. Yam hoik ploi Yawsux kix lih hu dee singai ka nyiex kix khankix, nawh nawb buan ka piang kix heue.<sup>8</sup> Nawh ah nin ka kix, “Deeh ing tau mai krax pa magmi pex tomnie, ka nyiex pex tau mai tobrie eei pex pa kied haohhun tau mai mau khri pex tau mai tawng, rhiem pa shiao pex, tau mai kraung ceep pex tomnie heue. Goh kraung pa pon tudrhim pex khaing pui koengkankix ka puxaik pex heue.<sup>9</sup> Mawh kheu nan, kawm praix Rubin, kawm praix Gat mai doehru Manashe tix plak, deeh ing mai lih hu khaing pui Isarela x khankix ka veng Shilaw pa koe ka daux haktiex Khanan, sonsang hu kix ka daux haktiex Gilat pa mawh haktiex pa hoik pon kix ti cie pa mawh cie kix, awm gumlox pa hoik tawm Simiang Siyiex ka Mose heue.

#### ***Khu Dee Tan Hawt Rawm Yawdan***

<sup>10</sup> Yam hoik hoek kix ka baoh rawm klawng Yawdan pa koe ka daux haktiex Khanan, kawm praix Rubin, kawm praix Gat mai doehru Manashe tix plak sum khu dee tan pa ting mai pa kied sidawng tix yaox ti mu hawt rawm klawng Yawdan heue.<sup>11</sup> Yam in, pui Isarela x khankix hoik mhong lox pa kra i pui tix kaux pa ah nin, “Jhak heue, ceu pui Rubin mai ceu pui Gat mai doehru Manashe tix plak hoik sum khu dee tan tix mu ka piang toh mee haktiex Khanan hawt baoh rawm klawng Yawdan, ka praok plak pa hoik teei pui Isarela x khankix ti ot heue.”<sup>12</sup> Yam hoik mhong pui Isarela x khankix ka grawng ankix, cub pui hun pui Isarela x khankix khrawm paox tix tau ka veng Shilaw sonsang hu yuh naing ka kix

heue.<sup>13</sup> Khaix an, pui Isarela x khankix ploi Phinihat pa mawh kawm simex cao giex kaing li Eliaza hu ka pui Rubin, pui Gat mai ka doehru Manashe tix plak pa ot ka daux haktiex Gilat<sup>14</sup> tau mai cao kaing pa kuang piang kix kao kaux pa laug kix ti teei khaing cao kaing ting pa kuang ka piang doeh nyiexma ceu pui Isarela x khankix ku cub mai cao kaing pa kuang pui tix rheng ka daux nyiexma keeing kix ku cub, khaing daux sinax cub pui Isarela x khankix heue.<sup>15</sup> Khaix an, kix hoek ka pui Rubin, ka pui Gat mai ka pui Manashe tix plak pa ot ka daux haktiex Gilat mai kix sikah tau mai kix ah nin,<sup>16</sup> Cub pui hun Simiang Siyiex khankix khawmuik hoik ah yuh nin, in mawh krax pa ang pex kaux sijax mai krax pa hoik lud pex ka Simiang Siyiex ceu pui Isarela x sonsang veeh pex ti hu ka dee singai ka daux singaix in, khaing hawt tix Simiang Siyiex mai pex hoik sum khu dee tan tix mu ka son tokaux pex, sonsang pon tiehfeen pex ka Simiang Siyiex ka daux in singaix, ka grawng ceu patix lie?”<sup>17</sup> Mawh ang phimap pa yuh pex ka baoh veng Pegurax, nyang bax kub son pex lie? Khaing pa mawh ex pa ang singax tom hoek ka daux singaix in, viang krax kham geu hoik koe ka daux cub pui hun Simiang Siyiex,<sup>18</sup> mawh sang veeh pex ti hu ka dee singai ka daux in singaix khaing krax pa hawt tix Simiang Siyiex lie? Ankix tak lih ti mawh, phan pex tiehfeen ka Simiang Siyiex ka daux in singaix mai Nawh Cao tak koe krax pa songrhawm ka cub pui hun ceu pui Isarela x khankix pasax heue.<sup>19</sup> Viang mawh nan, phan haktiex pa pon pex ti cie mawh pa ang singax, khaix an, tiang ti hu ka haktiex cie Simiang Siyiex ka dee jung nyiex gox buan man Simiang Siyiex ti ot mai teei ti cie ankix tau mai yix heue. Paw doh tiehfeen ka Simiang Siyiex mai paw doh tiehfeen ka yix, ka hoik sum ti khu dee tan tix mu ka son pex, lheu khaing khu dee tan Simiang Siyiex ex heue.<sup>20</sup> Akhan, pa mawh kawm simex Zerax, hoik lud ka daux ceu pa jhaxlawg tix mai pa songrhawm hoik hoek ka piang pui hun Isarela x khankix ang mawh lie? Pui an ang tie mawh pa graigrhup nong nong ka daux phimap pa yuh nawh heue.”<sup>21</sup> Khaix an, kawm praix Rubin, kawm praix Gat mai doehru

Manashe tix plak, deeh pawk loxah ninka cao kaingpakuang ka piang ceu pui Isarela x tix rheng kaux, <sup>22</sup> "Siyiex piang siyiex, Siyiex piang siyiex mai Tokaux Nawh Cao hoik mawh pa tawng mai kieh ceu pui Isarela x khankix tawng ka tokaux Cao Tix, phan yix mawh pa tiehfeen mai phan yix mawh pa ang kaux sijax ka Simiang Siyiex, paw lai kieh yix im ju in singaix heue. <sup>23</sup> Phan yix hoik sum khu dee tan tix mu son tokaux tix sonsang deeh veeh yix tix khaing dau x krax pa hawt tix khaix Simiang Siyiex, phan ang mawh nan, pa yuh yix son krax tan pa gleeing khankix, phan ang mawh nan, krax tan ceu pa ih khankix angah, pa yuh yix sonsang tan tix krax tan pa nhim khankix ka piang an angah, kieh Tokaux Simiang Siyiex chaw k ti yao x ka grawng an heue. <sup>24</sup> Viang mawh nan, yix hoik yuh ka son pa koe grawng tix ceu mai pa ah nin, Ka dau x bawgyam pa sang hoek sax, lhat ex doehru pex ah nin ka doehru ex khankix, mawh hoik yuh pex ceu patix tau mai Simiang Siyiex ceu pui Isarela x lie? <sup>25</sup> Simiang Siyiex hoik yuh rawm klawng Yawdan mawh mee haktiex tix dah ka son pex mai yix pa mawh kawn praix Rubin mai kawn praix Gat khankix heue. Pex ang koe ceu pa sang pon ka dau x Simiang Siyiex heue. Mawh kheu nan, doehru pex tak yuh doehru ex khankix ang lai koe krax lhatgraung ka Simiang Siyiex heue. <sup>26</sup> Mawh kheu nan, ex tom ah nin, kieh ex khrierien tix sum khu dee tan tix mu son tokaux ex, pa ang mawh son krax tan pa gleeing mai krax pa appong ti tan tang ceu khankix heue. <sup>27</sup> Viang mawh nan, sonsang mawh an mhairug ka sinax pex mai yix, khaix yix sax, doehru yix tak pon ti yuh kaing krub ka Simiang Siyiex ka plak sivo e Nawh Cao tau mai krax tan pa gleeing yix mai krax pa appong yix ti tan mai krax tan pa nhim yix, son ang doehru pex pon ti ah lox ka doehru yix, ka dau x bawgyam pa sang hoek. Pex ang koe ceu pa sang pon ka dau x Simiang Siyiex heue." <sup>28</sup> Mawh kheu nan, yix tom ah nin jao an heue. "Ce u an khankix tak lih ti koe yam ah pex inkix ka yix angah, ka doehru yix angah, ka dau x bawgyam pa sang hoek sax, yix tak pon ti ah nin, "In mawh grang khu dee tan Siyiex pa hoik yuh keeing ex khankix, an ang mawh

son krax tan pa gleeing mai son krax pa appong ti tan tang ceu khankix, viang mawh nan, mawh mhairug ka sinax pex mai yix heue." <sup>29</sup> "Kieh ankix mawh pa singai khaing yix sonsang pon yix ti tiehfeen ka Simiang Siyiex mai son krax pa veeh yix tix khaing krax hawt yix khaix Siyiex ka dau x in singaix mai sonsang sum yix khu dee tan tix mu son krax tan pa gleeing khankix mai son krax tan ceu pa ih, phan ang mawh nan, son krax pa appong yix ti tan hawt praok khu dee tan Simiang Siyiex yix, pa koe ka plak sivo e nyiex gox buan man Nawh Cao heue." <sup>30</sup> "Yix hoik mhong cao giex kaing li Phinihat mai cao kaing pa kuang ka piang cub pui hun, cao kaing pa kuang ka piang pui Isarela x tix rheng, pa hoik ot tau mai nawh khankix, kawn praix ru Rubin, kawn praix ru Gat mai kawn praix ru Manashe khankix deeh sikh lox pa nyawm rhawm ka kix heue." <sup>31</sup> Khaix an, Phinihat pa mawh kawn simex cao giex kaing li Eliaza, deeh ah nin ka ceu Rubin, ceu Gat mai ceu Manashe khankix, "Ka dau x singaix in, ex hoik yao x ka ot Simiang Siyiex ka dau x sinax ex. Pex ang lai koe krax lud ka dau x krax pa kaux sijax pex ka Simiang Siyiex heue. Yam in, pex hoik deeh taoh pui Isarela x lih hu khaing dau x tawm taix Simiang Siyiex heue." <sup>32</sup> Khaix an, Phinihat, kawn simex cao giex kaing li Eliaza mai cao kaing pa kuang ka piang pui Isarela x, deeh ing khaing ceu Rubin mai ceu Gat khankix, khaing haktiex Gilat mai deeh ing ka haktiex meung Khanan ka dee ot pui Isarela x, kix deeh viex gumlox ankix hoek ka pui Isarela x heue. <sup>33</sup> Mawh kheu nan, ceu pui ankix mawh pa khaw rhawm ka pui Isarela x mai kix yaogyaw buanson Simiang Siyiex yam an heue. Kix ang lai koe lox ne, sonsang hu puing kix naing mai sonsang yuh kix haktiex dee ot ceu Rubin mai ceu Gat khankix lauxleeing heue. <sup>34</sup> Ceu Rubin, ceu Gat khankix kok ceukaux khu dee tan an mawh Eda, grawh grawng nawh, an mawh pa kham mhairug tix ceu dau x sinax yix, grawng mawh Siyiex, Simiang Siyiex heue."

**23** *Lox Pa Ghoik Yawsux Ti Krai*  
Khaix hoik luan ceu an khankix mai khaix hoik taw x Simiang Siyiex krax ot nhim ka pui Isarela x khankix tom rheeng bawgyam,

khaing pui pa koeng kix pa ot hawt vungviang kix khawmuik, Yawsux hoik kuad mai riex ju hu sipie heue.<sup>2</sup>Yawsuxkokka ceu pui Isarela khawmuik, khawm kuad riex ju mai khawm cao kaing kix, cao prawngsee kix, cao kaing naing kix khawmuik mai nawh ah nin ka kix, "Aux hoik kuad mai riex ju hu sipie,<sup>3</sup>pex hoik yaox ka canceu pa hoik yuh Simiang Siyiex khawmuik ka ceu pui inkix kheu jao pex heue. Simiang Siyiex pex hoik mawh pa hoik puing naing ka son pex heue. <sup>4</sup> Jhak heue, Aux hoik goih ti tawx haktiex pa kawn deuk an khankix kaceu pui inkix, ka pa cawx kix niep sonsang pon ankix ti mawh sinngao ka son doehru pex, jah ka rawm klawng Yawdan tau mai ceu pui pa hoik teei aux ti tik khawmuik tom hoek ka rawm sigrit sigra ting, ka plak baoh plak klip heue. <sup>5</sup> Simiang Siyiex pex tak grheu ti tik kix khaing plak sivoie pex mai grheu kix lih hu ka plak sivoie ngai pex heue. Mawh kheu nan, pex tak pon ti cie haktiex kix awm hoik yuh Simiang Siyiex lox sijax mukheu tau mai pex heue. <sup>6</sup> Mawh kheu nan, priex rhawm tix mai kieh koe rhawm kua mai yuh ceu ankix khawmuik pa hoik tiem ka daux phuk lai pingnyap Mose heue. Phan ang mawh nan, aux lhat pex veeh rhawm ti hu khaing ceu ankix ka plak khawn dawm mai khawn goix,<sup>7</sup>aux lhat pex hu laig ka daux sinax ceu pui inkix pa kawn deuk ka daux sinax pex heue. Pex tak ang pon ti simawd ka ceukaux siyiex kix mai pex tix kaux kawx tak ang pon ti yuh krax pa tiextu tau mai siyiex kix, pex tak ang pon ti yuh kaing kix mai tak ang pon ti krub ka kix heue. <sup>8</sup> Viang mawh nan, pex tak mawh pa kauxcong ka daux Simiang Siyiex pex awm pa hoik yuh pex ka daux in singaix heue. <sup>9</sup> Grawh grawng nawh, Simiang Siyiex hoik grheu kix lih khaing plak sivoie pex, pa mawh ceu pui pa ting mai pa koe riang khankix heue. Viang mawh nan, pui tix kaux kawx ang nyang bax pon ti cung ka plak sivoie pex ka daux in singaix heue. <sup>10</sup> Pui pex tix kaux tak pon ti pheet ka pui tix rheng, grawh grawng nawh, Simiang Siyiex pex mawh Cao pa puing naing ka son pex

awm hoik yuh Nawh lox sijax mukheu tau mai pex heue. <sup>11</sup> Mawh kheu nan, rien rhawm tix, ka son tokaux pex sonsang moh pex ka Siyiex pex Simiang Siyiex heue. <sup>12</sup> Phan ang mawh nan, pex tak deeh plak khaix tix mai hu peung ka ceu pui pa kawn deuk inkix mai pex yuh ti mawh nyiexma tau mai kix, pex hu laig ka daux kix mai kix tak deeh laig ka daux sinax pex mai <sup>13</sup> pex yuh ti tawng tom kriem sivoie ang Simiang Siyiex pex lai koe rhawm tix grheu ceu pui inkix lih khaing plak sivoie pex heue. Viang mawh nan, kix tak mawh kie pa taong mai kreem pa taong khankix ka son pex mai khaox pa sivied khankix ka praok pex mai kat lawm ka daux ngai pex tom hoek bawgyam grai grup pex khaing daux haktiex pa mhawm in pa hoik tawx Simiang Siyiex ka pex heue. <sup>14</sup> Jhak heue, aux sang hu ka daux krax hu kawn pui piang haktiex khawmuik ka daux in singaix, pex hoik tawng ceu inkix khawmuik ka daux rhawm pex mai ka daux khuan ju pex, son ang ceu inkix sang pon ti mawh ceu pa somnai tix ceu kawx ka daux canceu pa mhawm khankix mai ka pa hoik kraik Simiang Siyiex pex ka son pex heue. Ceu an khawmuik hoik mawh pa lih mawh ka son pex mai gumlox Nawh tix gum kawx tak ang mawh pa hoik somnai ka son pex heue. <sup>15</sup> Mawh kheu nan, ceu an khankix tak mawh pa lih ti hoek awm hoik hoek canceu pa mhawm khawmuik ka piang pex pa hoik yuh Simiang Siyiex pex lox sijax mukheu tau mai pex heue. Awm ankix, Simiang Siyiex tak viex canceu pa kham geu khawmuik hoek ka piang pex tom hoek bawgyam hoik yuh Nawh Cao pex lauxleeing khaing haktiex pa mhawm in pa hoik tawx Simiang Siyiex pex ka pex heue. <sup>16</sup> Yam hoik koe krax lud pex ka lox tawm pingnyap Simiang Siyiex, pa mawh gumlox pa hoik tawm Nawh Cao ka pex mai pex lih hu yuh kaing jhaw siyiex tang kaux khankix mai hu krub ka ankix, khaix an, krax pa songrhawm Simiang Siyiex tak lih ka piang pex awm hax ngu mai pex tak niied ti graigrhup khaing haktiex mhawm pa hoik tawx Nawh Cao ka pex heue."

**24** *Lox Sijax Mukheu Veng Shekhem*  
 Khaix an, Yawsux kraixkhrawm doehru ceu pui IsarelaX khawmuik ka veng Shekhem mai nawh kok kuad riex ju pui IsarelaX khankix mai cao giex kaing kix mai cao prawngees kix mai cao kaing naing kix khawmuik mai kix hoek ka plak sivoes Simiang Siyiex heue.<sup>2</sup>Yawsux ah nin ka pui khankix, "Grawng lox pa hoik krai Simiang Siyiex ka pui IsarelaX, mawh pa koe yuh nin, keeing pex khankix khawm Terax pa mawh keeing Abraham mai pa mawh keeing Nakhaw khankix hoik dawg ot ka plak toi rawm klawng in tom didix mai kix hoik mawh pa yuh kaing jhaw siyiex tang kauxkhankix heue.<sup>3</sup>Khaix an, Aux hoik teei keeing pex Abraham kaing plak toi rawm klawng mai thung kix hu ka dauX haktiex Khanan khawmuik mai hoik yuh doehru nawh khankix haohhun mai hoik tawX Icak ka nawh heue.<sup>4</sup>Ka son Icak, Aux hoik tawX Yakop mai Isaw, son Isaw, Aux hoik tawX nawh cie gawng Sirax heue. Viang mawh nan, Yakop mai kawn praix nawh khankix lih hu ka plak meung Ejiptux heue.<sup>5</sup>Aux baox deeh ploi Mose mai Arun mai Aux hoik yuh krax pa ciyang ka meung Ejiptux, awm ceu pa hoik yuh Aux ka dauX sinax kix heue. Khaix hoik ceu ankix Aux hoik viex pex lih hu heue.<sup>6</sup>Khaix an, Aux hoik viex keeing pex lih kaing dauX meung Ejiptux mai pex hoik hoek ka rawm sigrit sigra Edom mai pui Ejiptux khankix hoik hawt ti pheet khaix keeing pex khankix tau mai linglawX brung mai pui naing brung tom hoek ka rawm sigrit sigra raoh heue.<sup>7</sup>Mawh kheu nan, kix kokyolox tix ka Simiang Siyiex mai Nawh Cao hoik deuh pa faik ka dauX sinax pex mai pui Ejiptux khankix mai viex rawm sigrit sigra hoek ka piang kix mai kheem ti tik kix. Ngai pex hoik yaox ka ceu pa yuh Aux ka dauX meung Ejiptux heue. Khaix an, pex hoik yaox ti ot ka dauX tiag tomnie rheeng bawgyam mai<sup>8</sup> Aux viex pex hu ka dauX haktiex ceu pui Amawrix khankix pa hoik ot kaplaktoi

rawm klawng Yawdan mai kix puing ka pex heue. Viang mawh nan, Aux hoik ap ti tawX kix ka dauX tawm taix pex sonsang pon pex ti cie haktiex kix mai Aux hoik yuh kix lauxleeing khaing plak sivoes pex heue.<sup>9</sup>Khaix an, Baliet pa mawh kawn simex Ziphaw mai pa mawh simiang haktiex Mawbax yaog ti yuh naing ka ceu pui IsarelaX khankix mai nawh hoik ploi pui hu kok Balam pa mawh kawn simex Bawrax sonsang hoek ti jhaxlawg pex,<sup>10</sup> viang mawh nan, Aux ang cu ti nghiet ka Balam heue. Mawh kheu nan, nawh baox sitioe ti nawb buanka piang pex sinyek sinyek heue. Kheu jao an, Aux deeh taoh pex lih khaing dauX tawm taix nawh heue.<sup>11</sup>Khaix an, pex tiang ti hu ka rawm klawng Yawdan mai hoek ka veng Yerikho, pui veng Yerikho deeh puing ka pex khawm pui Amawrix, pui Pherazix, pui Khananix, pui Hittix, pui Giragashix, pui Hewix mai pui Yebusix khankix, viang mawh nan, Aux hoik tawX kix ka dauX tawm taix pex heue.<sup>12</sup>Aux hoik ploi awng lung hu ka plak sivoes pex mai grheu ti tik kix lih khaing plak sivoes pex khawm simiang haktiex pui Amawrix khankix ra kaux heue. Viang mawh nan, ang tie mawh jao vaid lawm pex mai ak pex pa grheu kix lih,<sup>13</sup> mawh Aux pa hoik tawX haktiex tix mu ka pex pa ang pex yaox ti yuh ka riang rao tix mai veng khankix pa ang pex yaox ti sum mai pex yaox ti ot ka dauX ankix heue. Pex yaox ti ih sipeem plix siiet mai sipeem khaox sanlun khankix pa ang pex yaox ti sum khankix heue.<sup>14</sup>Mawh kheu nan, yam in koe krax lhatgraung ka Simiang Siyiex mai krub ka Nawh Cao ka dauX krax pa koe rhawm rahsee tix mai ka dauX krax pa mawh pa meh heue. Tik siyiex pa hoik krub keeing pex ankix ka plak toi rawm klawng an mai ka dauX haktiex Ejiptux, ka dauX singaix, krub ka Simiang Siyiex awx.<sup>15</sup>Phan pex keud grawng pa krub ka Simiang Siyiex mawh pa caox son pex, laug son tokaux pex dauX in singaix, sang krub siyiex keeing pex pa koe plak toi rawm klawng pui Amawrix pa hoik

24:2 Yam 11:27. 24:3 Yam 12:1-9, Yam 21:1-3. 24:4 Yam 25:24-26, Yam 36:8. Yam 46:1-7.

24:5 Lih 3:1; 12:42. 24:6, 7 Lih 14:1-31. 24:8 Si 21:21-35. 24:9-10 Si 22:1; 24:25. 24:11 Yaw 3:14-17. 24:11 Yaw 6:1-21. 24:12 Lih 23:28, Pi 7:20. 24:13 Pi 6:10-11.

ot sinax pex lie? Viang mawh nan, phan mawh aux mai nyiexma aux, yix tak krub ka Simiang Siyiex heue.”<sup>16</sup> Mawh kheu nan, pui khankix deeh pawk lox nawh ah nin, “Kieh ceu pa tikvud ka Simiang Siyiex mai pa krub ka siyiex tang kaux singai khaing yix liak.”<sup>17</sup> Grawh grawng nawh, Simiang Siyiex mawh pa hoik viex ex mai keeing ex lih hu khaing dauh haktiex Ejiptux mai khaing dauh nyiexma pa yuh ex kaing siliex mai krax pa hoik yuh Nawh Cao mhai pa daoxdeng pa ting mai krax pa hoik priex Nawh Cao ka ex ka dauh krax pa hoik hu sinax pui khankix mai can dee pa hoik tiang ex ti hu heue.<sup>18</sup> Simiang Siyiex hoik grheu pui ankix khawmuik khaing plak sivoex khawm ceu pui Amawrix, pa hoik ot ka dauh haktiex an heue. Ex kawx tak sang yuh kaing krup ka Simiang Siyiex, kheu mawh Nawh Simiang Siyiex ex heue.”<sup>19</sup> Viang mawh nan, Yawsux deeh ah nin ka pui khankix, “Pex tak ang pon ti krub ka Simiang Siyiex kheu mawh Nawh Simiang Siyiex pa singax singeh heue. Nawh mawh Simiang Siyiex pa bak viang heue. Nawh tak ang pon pluatploi pa lud pex khawm phimap pex heue.”<sup>20</sup> Phan pex tikvud ka Simiang Siyiex mai krub siyiex tang meung khankix, Nawh Cao tak veeh tix mai yuh krax pa ciyang ka pex mai yuh pex lauxleeng, khaix hoik yuh Nawh Cao pa mhawm ka pex heue.”<sup>21</sup> Pui khankix deeh ah nin ka Yawsux, “Ang mawh, yix tak krub ka Simiang Siyiex heue.”<sup>22</sup> Mawh kheu nan, Yawsux deeh ah nin ka pui khankix, “Pex mawh pa kham mhairug ka tokaux tix mai pex hoik laug ti teei Simiang Siyiex son tokaux pex sonsang krub pex ka Nawh Cao heue.” Kix deeh ah nin, “Yix mawh pa kham mhairug khankix heue.”<sup>23</sup> Nawh deeh ah nin ka kix, “Mawh kheu nan, yam in teei ti tik siyiex tang meung pa koe ka dauh sinax pex khankix hu dee singai mai deeh tieh rhawm pex hoek ka Simiang Siyiex ceu pui Isarelax heue.”<sup>24</sup> Pui khankix deeh ah nin ka Yawsux, “Yix tak krub ka Simiang Siyiex mai yix tak cu nghiet ka gumlox Nawh Cao heue.”<sup>25</sup> Mawh kheu nan, Yawsux hoikyuh sijax

24:30 Yaw 19:49-50. 24:32 Yam 33:19, Yo5:4, Kawn 7:16, Yam 50:24-25, Lih 13:19.

mukheu tau mai pui khankix ka dauh singaix an mai nawh hoik yuh ti tawx been pingnyap ka son kix mai khawm been lox tat jhawm prawng son kix ka dauh veng Shekhem heue.<sup>26</sup> Khaix an, Yawsux hoik tiem gumlox inkix ka dauh phuk lai pingnyap Simiang Siyiex heue. Nawh teei lon simaox pa ting tix mu mai jung ti deuh an greem khaox tiah pa hoik koe hawt dee singax singeh Simiang Siyiex heue.<sup>27</sup> Yawsux deeh ah nin ka pui khankix, “Jhak heue, lon simaox in tak mawh mhairug ka son pex, kheu hoik mhong pex gumlox Simiang Siyiex pa hoik krai Nawh Cao ka ex khawmuik heue. Mawh kheu nan, an tak mawh pa kham mhairug ka son pex, phan ang mawh nan, aux lhat pex thieng ti tik ka Simiang Siyiex pex heue.”<sup>28</sup> Mawh kheu nan, Yawsux deeh kieh pui khankix lih hu khaing tix mai kieh kix deeh ing ka sinngao cie tokaux tix kukaux heue.

#### **Grawng Yum Yawsux** (Cao 2:6-10)

<sup>29</sup> Khaix hoik luan ceu inkix, Yawsux pa mawh kawn simex Nun, pa mawh kawncau Simiang Siyiex, hoik yum yam koe ju nawh tixyieh kao num heue.<sup>30</sup> Mai kix hoik sipaung nawh ka dauh mee haktiex sinngao cie nawh, ka veng Timanaserax pa koe ka piang gawng Epharim, ka plak laong khaing gawng Gasha heue.<sup>31</sup> Ceu pui Isarelax khankix hoik krub ka Simiang Siyiex glang singaix im ju Yawsux heue. Khaix ang Yawsux lai koe, kuad riex ju pa hoik sax ot mai hoik sax tawng ka kaing jhaw pa yuh Simiang Siyiex khawmuik tau mai Yawsux, kix yuh kaing krub son ceu pui Isarelax khankix heue.<sup>32</sup> Mai kix hoik sipaung si-ang Yosiep, pa hoik viex kawn praix Isarelax khankix lih hu khaing dauh meung Ejiptux ka veng Shekhem, ka dauh guang haktiex pa hoik liag Yakop khaing kawn simex Hamaw pa mawh keeing Shekhem, ka mau lua hixyieh plah mai biang haktiex an, hoik lih ti mawh sinngao cie kawn praix Yosiep tix dah heue.

#### **Grawng Yum Eliaza**

<sup>33</sup> Eliaza pa mawh kawn simex Arun hoik yum, kix hoik sipaung nawh ka piang ton gawng tix mu pa mawh cie kawn simex nawh Phinihat pa hoik tawx kix ka nawh ka piang gawng Epharim khankix heue.